



21243

III

Mag. St. Dr.

P

*Frederici Andreae Felix Varmastae prognosticon
ex concursu in Regno electorum primae magni
tudinis.*

PANEG. et VITAE

Polon. Fol.

N^o. 994.

Biblioteka Jagiellońska



stdr0003029

FELIX SARMATIÆ
PROGNOSTICON

Ex concursu in Regno Astrorum
Primæ Magnitudinis
ILLVSTRISSIMORVM nempe SPONSORVM

ILLVSTRISSIMI DOMINI

D. F E L I C I S

DE POTOK IN PODHAYCE,

P O T O C K I,

Sokaliē. Ropciceŋ: Krasnostauieŋ:

C A P I T A N E I,

Illustr^{mi} Palatini Crac: & Regni Supremi
Exercituū Ducis, Magnæ Spei Filij.

AC

ILLVSTRISSIMÆ

C H R I S T I N Æ

COMITISSÆ IN WISNICZ ET IAROSLAW,

L V B O M I R S K A.

Illustr^{mi} Regni Supremi Marschalci &
Campiducis Lectissimæ Filia.

Circa Nuptialem Pompam
In ŁANCZVTH ARCE LVBOMIRSCIANA Celebratam
P R Æ V I S V M,

ET PER

ANDREAM TRETERVM Acad: Cracouiensis Stud:
Communi Patriæ Solatio

P R Æ S E N T A T V M.

Anno Dñi, M.DC.LXI. Die 18. Septembris.

Pieniążek N. 107. 577.



In Stemma Illustriſſimorum
S P O N S O R V M,
Omen Lætantis Patriæ.



Vidit SRZENIAVIIS aeterno Fœdere Lymphis
Iungi POTOCIAM patria mæſta CRUCEM.
Et longos hilari detergens pollice luctus,
Omina feſtino protulit iſta ſono:
Panditur en FLUVIUS, cui DIVINA innatet ARGO
Velleris Aurati Copta prona patet.
Nulla dehinc fugiet SIGNA hæc Victricia Colchis,
CRUX ſubiget cunctas FLUMINE Vecta plagas.



P A N E G Y R I C V S

Fortunam Patriæ Prognosticans.

FUnde hilares ô Phæbe dies, comptasq; sereno
 Lumine quadrigas, nostræ ad consortia flecte
 Letitiæ; Pronubus gratantia sidera tædis
 Alludent, focusq; sacris micet ignibus Æther;
 Dum festus præfulget Hymen tædæq; lugales
 SRZENIAUIIS nictantur aquis; & pabula ab ipsis
 POTOCIANUS Amor sumit maiora fluentis.
 En roseas insueta genas ut flamma pererrat
 Innocuusq; rubor sponsali incanduit ore
 Ignori Testis fomitis, qui deinde perennes
 Suauiter arsuræ in præcordia congeret ignes.
 Nobilis his flammis ad Amoris concidet Aras
 Victima, corq; uno duplex ardore cremabit.
 At Nos dum primo rude Pectus Amoris ab ictu
 Sponsi utriusq; flagrat, plenis bona sæcula votis
 Fundimus, & serus cinis, hæc sit Flamma precamur.



Opportunè admodum Fauentes Superi communi
 gementis Patriæ proludent leuamini, dum
 desideratam hanc Animorum Vestrorum ô
 Inclyta Arctoi Orbis sidera Illustrissimi Spon-
 si producunt coniunctionem; Fortunatus hic
 tantorum Luminum in ipso ferè Regni Horo-
 scopo, SRENIAVIANA nimirum Arce, con-
 gressus, Optimus est nostræ Significator inter-
 prelque fortunæ, & rectè abhinc depulsis nebulis sereniora augura-
 mur Tempora, quibus lætas Hymæneus vester præfert Faces. Satis
 hætenus feralibus arsimus tædis, quas tristis Erynnis & insana Mar-
 tis licentia per totam sparserat Sarmatiam; aliæ nobis ad tutiora præ-
 lucent flammæ, & pronubi Coniugij Vestri ignes, optatam naufraga-
 nti Patriæ monstrant Pharon. Non iam dubias spes ad dubiam ex-
 plora-

ploratrices Martis præmittemus Sphæram, & ab illo igneo Circulo
ancipitis decerpemus scintillas solatij: Securior Nobis sub tam fau-
sto Splendorum Vestrorum nexu, à Deâ Amoris, quam à Domino
Mortis præmicat Felicitas. Non incertos militarium Aquilarum vo-
latus, trepidi Augures anhelò sequemur intuitu, aut in cælorum ho-
stium extis ventura inspiciemus fata: certiora patent Auguria ex
his, quibus corda Vestra Primus Cupido circumuolitat Alis: certi-
or Haruspicina, ex Vestris ô Nouæ Amoris Hostiæ, nouo igne calen-
tibus visceribus, quæ penitus inspecta, non dubiam Patriæ porten-
dunt salutem. Nec verò inter hæc nostra, imò publica gaudia, fune-
stum illud Eridos formidamus Pomum, quod paribus Pelei ac The-
tydos interfertum solennijs clades demùm Græciæ, Troiæ excidia
parturiit; Feliciora Pacis ac Triumphorum Missilia spondent, Ad-
stites Nuptiali Vestro fæderi Gratia, quæ veluti secuturæ Feciales
Pacis, securitatem nostram Sacro coadunati tam Inclyti Sanguinis
paciscuntur Libamine. Habemus vel ipsos Illustrissimorum Paren-
tum Vestrorum vultus, spei nostræ Obsides, cupitæ felicitatis Seque-
stros; quorum festiuæ lætitiæ, tota promiscuo tripudio applaudit
Sarmatia; & iurè meritò, quis enim adeò deiectæ mentis fuerit, vt
tristi supercilio frontem asperet, tantis Heroibus ad secura gaudia
profluentibus? quis ad inanes hostium insultus fugitiuo sanguine
adpallescat, his Ducibus Illustrissimi Sanguinis retinaculo vnitam
Virtutem fundantibus? aut caliginem ab hostili puluere somniet sub
tanta Luce? Securus olim ad Cytharam & plectrum Achilles, impu-
nè ferocis Hectoris spreuit primum, mox positâ lyrâ contudit ausus,
docuitque consciùm suæ molis animùm, etiam inter Ludicra ac Can-
tus, fatales Hosti meditari saltus. Vestrorum hic Illustrissimorum
Parentum Genius est, qui in Geniales soluti curas, ipsis plausibus
Planctus Hosti ordinant; & per festa Epithalamia, lugubres infestis
cateruis præcinunt inferias. Nobis equidem ac toti Regno concors
hæc Ducalium animorum harmonia lætùm insonat, at Fædisfragis
illis aciebus, tristè immugit. Timeant meritò infruniti Asini vel ad
Nuptialem Lyræ, ad cuius numeros lethalem breui ordiuntur
Choream: nam vt Phæbus quo magis læto renidet ore, eo maiora
fulmina, coactis in vnum durat vaporibus, ita Heroicæ mentes, dum
sefe liberaliter publicæ hilaritati indulgent, tunc eâ ipsâ hilaritatis co-
te, natiuos impetus in publicos communis lætitiæ agyrtas magis acu-
unt. Et hæc sunt æquissimæ fiduciæ nostræ Pignora, Fortunæ Omi-
na, quæ non inter abdita cælorum rimati, sed in ipso Vultuum Ve-
strorum legimus aprico; Dextra nimirum Nobis omnia, data per
Vos ad

Vos ad Aras dextræ; Pacata, militantes nouo Cupidini etiam Martij Acinaces adpromittunt. Eant alij & publicam aut priuatam in Polorum vestibulo vestigent fortunam, vagosque rerum Cursus ac errores, vagis & errantibus imputent Astris; mihi semper alia ad communes satius valitura vsus placuit supputatio, vt nimirum propiores Animatorum siderum censerem concursus, quorum in minora hæc, eò maior potestas, quò magis è vicino emicuit, & subiectum Orbem non solisequis aut aliunde tractis sed congenitis splendoribus impulit. Talis sideratio plenis totius Regni excepta votis, dum Illustrissimas POTOCIORVM, ac COMITVM in Wisnicz & Iarossaw Familias, veluti Primæ Magnitudinis Stellas feliciter sociat, quid mirum, si iucundissimis Amoris capti Phanomenis ad Diuinanda Patriæ bona secreto quodam calore agimur? & felices ab hoc tot splendorum commercio impressiones expectamus. Est quædam in vobis ô Illustres Animæ, cæli aut æmula, aut cognata virtus, quæ infima hæc, ad instar Superiorum Orbium, tacitis sæcundat attenuatue influxibus, Vestris enim fermè mundus agitur momentis, voluitur successibus, & quemadmodum sublunarium vigor, ab illo Planetarum rotatu, ita publica fortuna à vestro pendet motu; Adeoque rectiores ille Fastos, è quibus certo imperiorum legerentur euentus digesserit, qui terrestres has magnarum mentium Siderationes, Progressus, Reuolutiones, Incrementa, & Deliquia ad calculum reuocarit. Horizontem vniuersi, Diuinus ille, satis Diuinè nuncupauit Plato Hominem, seu quod vnus totos naturæ terminet aspectus, & sparsam per varias species, Essendi varietatem, in seipso velut in plano cogat: seu quod totius vniuersi vim per sua commoda aut detrimenta fulgurantem persentiscat. Sed enim tanto licet Horizon iste concurrentis in se vniuersi laboret sub ictu, nulla tamen magis quam Vestra vi percellitur, nullos influxus tam vigili oculo, tam facili & prono excipit. gremio ac Vestros: immineat toruum Saturnus, tonet Iupiter, stridat Mauors, oculisque tuentibus hircum ambidexter rotet Mercurius, & tota minacis Signiferi volumina, ingentes mundo trudent casus; adhuc illud coniurati ætheris robur, sub Vestræ circumactu pendet Sphæræ, & (si benigno terras dignamini aspectu) tota malignorum siderum in perniciem contorta Orbita, ad Vestrum nutū, velut Primi mobilis raptum flecti in contrarium potest. Quid enim informes illæ belluarum formæ, per sola figmenta cælis insertæ, quas omni sanior sapientia, fatali exarmavit necessitate, vana sine viribus tumeant irâ, dum terrarum vices vobis non ficto cessæ iure meliora respiciunt gubernacula. Vos sanè Viri Principes succedanei estis

Supremo illi, qui stabilis manens dat cuncta moueri, inferioris mundi Motores; Vestrae Propagines, sunt quidam, Diuinæ illi Sphæræ, cuius circumferentia nusquam, contigui Orbes, agendis regnorum factis designati. In Vobis Dignior illa Aetheris hæsit portio, quæ primitus hominem animauit, & (si non tota in fabulis fabula est, aliquamque figmenta illa velant veritatem) famosus Promethei ignis, qui iam per viliores animas elanguit, in Vestris adhuc calet genijs: hinc primæ concolores Origini, altum semper vestri spirant spiritus, ac horum, quibus flammæ suas debent, siderum more, non licet illis subsistere, nec quidquam suum facere, sed irrequieta (vt ait Sapiens) cursus suos explicant. Insanus & merito Cosdrois labor, cælos intra vnus Palatii adita prodigioso ausu mentientis, & noua in terris signa, nouas zonas, ad polorum inuidiam Aulico Zodiaco illigantibus, vt saltem ficto gauderet æthere, veri inexpertus ac inops. pulchriorem sui imaginem in Heroum Familijs, miratur superior, reueretur inferior Orbis; vbi circa geminos Pietatis ac Sapientiæ Polos, integra ludunt virtutum agmina, & tota Gentilitij Decoris compages insignibus Æquanimittatis ac moderationis, hinc ne dehiscat, inde ne Icario ausu euolet, libratur Tropicis; Non hic, vt in Cosdrois decrepitiue Archimedis cælis artifex fucus, adscititios splendores illinit aut mergit; non trochlearum farrago, immò sæpè vnus fabrix rotulæ conuersio, totam adaptati xui seriem, protrahit aut elidit; sed virtus & Fortuna, incorrupti Opifices, Nobiles hæc Sphæras perenni gloriæ & Honorum voluunt tractu. Ad tam ordinatos propioris cæli motus, ô quanti auidissimo obtutu hiant spectatores! quantorum studia spem, immò salutem suam, illis desigunt aut horoscopant Epicyclis! Circumferunt plerique oculos, & feliciore ausu per publicas Illustrium Familiarum tabulas, quam per vulgatas Astrorum Ephemeridas, publicam vestigant fortunam. & noui Euclides ex insignium Profapiarum lineis, noua sed communibus votis accommoda firmant Elementa, delibant solatia. Ausus sum & ego Terrenam hanc profiteri Astronomiam, & fessæ tot luctibus Patriæ; in ominatissimis **POTOCIORVM** & **COMITVM** in Wisnicz & Iarossaw Domibus, meliorem designare fortunam, faustasque ex hac insigni Animorum coniunctione condere figuras. Peritiores equidem Mathesis ista poscebat Proelos aut Ptolomæos, sed quis etiam rudem damnet communis felicitatis vestigia relegendem, nisi qui communiter vetet esse felices? par est, vt omnium insonet vocibus, quod omnium vsurpatur sensibus.

Primam

Primam Nostram Felicitatē fœcundissimum omnigenæ felicitatis signum initiat, dum Tua Illustrissime SPONSE Gentilitia CRVX fluctuanti Patriæ inconcussam basim ponit. Elifus totâ iniquitatis mole mundus, vel in vnâ Cruce satis certo libramine constitit, ne ad primæuum raperetur nihilum; at ecce geminat subsidium POTOCIANA DOMVS, cum ternæ obiectu Crucis, ruinam & clades Regni auertere satagit. Ancipitem hætenus experti fortunam, satis illam prouido ô Sarmatæ, frenastis obice, dum ne lubricâ deinceps nutet rotâ, aut in Martialem excurrens campum, inimica molliatur transfugia, ad Fortunatum POTOCIANÆ CRVCIS deligastis Quadrum. In hoc Plano etiam inconstantissima sortis minimè exerrabit orbita; in quo totus postquam suum, immò omnis boni reperit centrum, non exerrauit Orbis. Vaga licet & standi rudis sit, hæc Inconstantia Dea, illo tamen libenter figitur & hæret loco, quo fixus ipse hæsit DEVS; destituet illam sub stabili Crucis signo sua leuitas, sub quo etiam DIVINVS IGNIS grauitauit. Præsumptuosa nimium Antonij Pij quartum iam Consulis vanitas, Fortunam obsequentem cuso nummo falsè comminiscens, Vertumnam enim hanc illo ipso tereti verti & excuti posse auro docuit, qui illius obsequia in volubilem nummum refinxit: raro illa fidelem pecuniæ locat operam, & licet interdum seruitia hac turpissima licitatione paciscatur, eodem tamen plerumque auro, quo empta putatur eliditur. Felicior Christi adum ausus, qui Fortunam obsequentem non auro, aut vili ære signant, sed ad illam Stateram, in qua Orbis appensum est pretium exigunt. In Iouis hortis beatam felicitatem nasci Sophocles & credidit & promulgauit. Nobis vna arbor, sed ipsi adamata Numini omnis felicitatis ferax est. Eam vt tandem prægustaret tot aduersorum satur Patria, dexterrimo omine ad POTOCIANAM CRVCEM respexit, cum geminos nouissimè aciebus suis præficiendo POTOCIOS, optatam salutem, à salutis signo, per illorum Arma, effulgente decerpturam se credidit. Nec verò quadripartito cincta hoste, certiùs opis suæ auspiciū, quàm à quadrifida sumere potuit Cruce; quâcunque Sol oritur vel moritur, Auster vel Aquilo spirat, abundè in omnes partes securitati suæ prospectum putauit, cum POTOCIANA ARMA, ipso habitu, hos omnes Orbis Triones amplexa, in Imperatoriâ speculâ excubare iussit. Tantum olim in vno frondentis auri Ramo spei pius reposuit Æneas, vt negata viuus claustra, solisque vmbis peruios aditus, auricomæ frondis cinctus munimine penetrarit; bellè satis ad auari Ditis genium, quem quia aureo fulgore deliniri credidit, à frondente metallo difficili viâ tutamen quæsiuit. Nobis Sacratiore

Censis cultu, quibus non fauores Plutonis emere, sed furores ipsos premere æterna lex est, certior à diuersâ Arbore tutela, nec bractea-
ta felicitas est: Illâ inquam Arbore, quam non diuitis Metallî vena splendido lenocinio percurrit, verum Dei virtus, pio intinctam cru-
ore, pretiosissimo suiipsius pondere fœcundauit. Fortunatum hoc Germen, toto Proserpinæ lûco, & mendacibus Alcinoi Hesperidum-
que hortis, longè nobilius, cum è Gentilitio POTOCIANÆ Stir-
pis pomerio, non iam ignauis columbis præducibus, sed Regali desi-
gnante Aquilâ prolatum, summæque rerum ac Bellorum hodie in
Illustrissimo STANISLAO POTOCKI, PARENTE Tuo, admotum
cernimus, ecquid irritas furentis Erebi minas, sub tam felicibus Ar-
mis metuamus? Frendat licet Triceps Cerberus, ternoque imminens
riçtu, hinc agrestem rebellium colluuiem, inde Moschouitica periur-
orum agmina, ac nouissime domestico vndantes turbine, miseræ
Patriæ infundat cateruas: Omnia hæc hiantis molossi ora, felicius
tempestiuus POTOCIANÆ CRVCIS domabit, aut in placidum resoluet
soporem occursum, quàm olim indultus Herculi, Cerberum domuit
ac consopiuit Mercurij Caduceus. Ex quo sequaces Christi crucem
ad militaris gloriæ consortia admisimus, minus profectò, aduerso in
Nos Marti licere, Fortunamque & victoriam pro Nobis sæpius, im-
mò veriùs pro Crucis signis stare videmus; tangit videlicet quidam
inconstantia suæ, vel licentissimam Fortunam rubor, à purpureâ
Diuino Sanguine coloratæ Crucis percussione proleçtus; adeòq;
iam & ipsa sub Crucis Labaro in gradu hædere didicit, & quæ alibi
frequenter mutat stipendia, velutumque vagatur more, huic annu-
merata signo, statarium militiæ gènus profiteri auet. Inclinaisset ad
validiores Maxentij turmas à Constantino profuga, ventosissima hæc
Dea, nisi obiectæ Crucis tardata imagine, victoriam ab hoc signo,
in quo DEVS vicit ablatam, transferre ad contraria pila erubuisset.
Experta sæpius parem obsecundantis Fortuna reuerentiam Sarma-
tia, cum POTOCII Ducibus Natiuæ Crucis signa feliciter expli-
cantibus, etiam inordinatissimam hanc Diuam Ordines illorum ser-
uare, fideliterque sub Cruce merere vidit. Certè quocunq; vsquam
POTOCII sua circumtulere Arma, sicut nunquam illos Fortitudo
& virtus, ita rarò Felicitas destituit; Diceres à Triumphali illorum
Insigni, Triumphalem in omnes dimanasse fœcunditatem, quæ PO-
TOCIORVM Arma in Amphiarai verteret, recoqueretur Tela, vt
in hostes emissa rarò aliter redirent, quàm Laureata. Non iam su-
os Attico Timotheo inuidemus casses, quos vel per somnum diuite
Arcium, Urbium, Regnorumque prædâ, sanè somnians, aut cæcâ
nocte

nocte merſa, onerare ſueuerat Fortuna. Nos Sarmatæ in POTO-
 CIOVM Armis vno, ſed certiore piſcamur hamo, illo nimirum, quo
 Potentiſſimus captus eſt Leuiathan. Nemo dehinc miretur POTO-
 CIANA obſetricante virtute, tot inclytas quotidie Patriæ naſci victo-
 rias, victricia illis ab ipſo Ortu Arma ſunt. Nemo ſtupeat fortiſſimos
 Duces, incorruptâ tot ſæculis, è Domo Potocia, prodire ſucceſſio-
 ne: Maximus Archiſtrategus, non iam per baltheum militare, ſed
 per Armorum ſuorum traditionem, bellis Illos & Triumphis auſto-
 rauit. Adoptatos in militaris gloriæ communionem, vt totus ſciret
 Orbis, illa victorioſiſſimi Ducis POTOCIIS inſerta Teſſeris, teſta-
 tur Claua, à quâ totæ Tartarei hoſtis concidère vires. Achillis Cly-
 peus tot quondam Procerum contentionibus exambitus, Supremi
 in Græcas acies Imperij Prodronus ſimul & portitor fuit, Summum
 enim Maieltatis Ius ad Poſſeſſorem tranſtulit: CRVX poſthuma
 quædam triumphantis Chriſti Parma eſt, hanc quia in nobiliſſimo
 POTOCIANÆ Stirpis Armario depoſuit, ſicut ad maxima quæque vir-
 tutem illorum, tam caro pignore obligauit, ita eadem Teſſerâ, vbi
 par bellis ac triumphis deſideat vigor, patentiſſimè deſignauit. Se-
 quitur hodieque Sarmaticus Orbis iudicium Numinis POTOCI-
 OS Armorum ſuorum conſeſſione, meliùs quàm olim Alexander
 Perdiccam tradito annulo ad Caſtrorum regimen euocantis; nec ali-
 bi ſuis aciebus feliciore euentu Duces, quam ſub hoc Supremi Du-
 cis quærit ſigno. Et verò Diuini Herculis clauam nulli rectiùs hæ-
 reditare debuerant quàm Præliares Theſei; molles dexteras, & poti-
 ores penſo quam Capulo manus, tam grauiâ vel ipſis inferis dedignâ-
 tur Arma. Veterana vexillum hoc poſcebat brachia, nam Summo
 Regni ſui Labaro delicatos Incarnatus DEVS baiulos non apponit.
 In ea itaque Domo, quæ Sago æquè ac Toga exercita, ſicut bellis
 pacem mercatur, ita pace ad bella innutritur, Nobile hoc ſignum
 Numen depoſuit; quod ſibi & maximi belli adminiſtrum, & æternæ
 cum mundo pacis hucuſque eſt ſequeſtrum. Eant alij & prodigioſis
 Deorum commentis ſuas impleant Origines, ſit à Ioue Tertius
 Ajax, Phæbo Phaeton, Neptuno Neoptelemus, Thetydi Achilles,
 Veneri Æneas, vanos imputent Ortus, æquè turpiter mendacijs, ſeu
 malint criminibus quæſitos: quanto Sanguine POTOCLI cenſean-
 tur, illud eorum Originarium loquitur Signum, quod Diuinus ali-
 quando Sanguis conſecrauit. Sub hoc Genethliaco Domæſticoque
 Familiæ ſuæ Aſtro exorti, quemadmodum primos ac generoſos hau-
 riunt ſpiritus, ita ab eodem felices ad ſumma quæque perficienda de-
 libant influxus. Cenſeat quidquid allubefcit vulgata Matheſis de for-

tunato nascentibus Horoscopantis sideris Trigono, POTOCHS sub
Increati Solis signo exortis Fortunatissimus Natiuus illorum Qua-
dratus est. Hic Tropicus, in quo quondam suas Sol Iustitiæ absoluit
Retrogradationes, dum vitalia POTOCHORVM lustrat primor-
dia, certiùs illis imperium, quàm vanus Augusto portendit Tropicus
Capricorni: suo prælucente signo, Victoriâ per Multas, Gloriâ per
omnes gentes ac regna protulerunt; Gentilitioque illi conformes
Heptangulo, fama Nominis vniuersitatem complexi sunt. Profectò
dum Insignia Vestra in triplum assurgente Cruce insignita contueor,
quandam Gloriæ Vestræ dimensionem spectare me reor; vt enim
patētem quâ virtus & Fortuna Vestra excurreret haberetis campum,
nouo sed Diuino, quem hæreditarijs præfertis tesseris Astrolabio, to-
tum Vobis mundum designastis; segmina illa Crucis omnibus im-
minētia Trionibus, tempestiuos iam inde Gloriæ Vestræ, descri-
psere ac metata sunt limites. Et benè; non hæsit intra vnius Patriæ
ambitum, nedum intra angustos defossa Lares Fortitudo Vestra;
eisdem suos putauit, qui vniuersi essent, terminos; POTOCHÆque
illud deberi credidit industriæ, vt Gentilitia per Orbem Arma cir-
cumferens, Crucis suæ Gloriâ, arduam illam, sed verè inclytam mun-
dani circuli perficeret Quadraturam. Non vacat ad altiora sæcula
fatiscētem sub POTOCHANARVM laudum pondere tendere calamum;
quæ enim penna in tantum attolli queat dicendo, quantum POTOCH-
ANA virtus attigit vincendo? Proniora sequar, & quæ præsens aspe-
xit suspexitque sæculum, Magnanimitatis POTOCHÆ Decora, ve-
ro magis quàm compto promam eloquio; nam & POTOCHS vi-
rilis, non calamistrata virtus est. Inferte oculos Moldauicis Dacicisq;
campis, illic quoque per mortuales cespites, queis exesa cælorum
hostium premuntur ossa. POTOCHANA Laus & Fama pullulat. Illo
cruore, quem de meritis rebellium iugulis Vester eduxit gladius, ma-
dens hucusque Moldauica gleba, non alios, credo, producit flores,
præter eos, qui POTOCHANVM, æquè ac olim de Aiæ natus
Sanguine, ferat ac describat Nomen. Viuit in illis regionibus Ma-
gnus & suam adæquans famam IOANNES POTOCHKI Constan-
tino ad fastigia Moldauica, & Simeoni ad Valachica, eluctanti, in-
gentis fortunæ à Republica Prodromus datus & Ductor; qui gemi-
nos tam speciosi Apicis riuales, Rosuanum & Michaëlem, illum vitâ,
hunc Castris & potentiâ, vtrumque male quæsito exuit ac exegit
Principatu; & clientibus Poloniæ, ad concupitum Ducalis eminē-
tiæ culmen, pronam ac facilem, instratis hostium cadaueribus fecit
viam. Aderat tanto Patruo indiuisus spei periculiq; Comes Illu-
strissi-

strissimus Parens Tuus, prima vincendi rudimenta, sub tam victorioso Duce auspicatus, iamque tum Magnus hic Achilles Sarmaticus, sub melioris tutelâ Chironis, non ad ceruorum medullas, sed ad hostile tabum exercitus, futuræ triumphorum Iliadi præludebat. O quantus ibat, suo se ipse signans decore & virtute! cum niueum iuuentæ florem, primo inimici sanguinis ostro inficeret, & fugacibus Dacorum imminens cateruis, terrorem ac victoriam, omni latè Moldaviâ, Valachiaque proueheret. Loquuntur hucusque inuictum eius Patruiq; robur, si non homines aduersus felices semper obliqui, at ipsi fatales aggeres, per cæsorum hostium aggestus, & POTOCIANOS triumphos assurgētes. Quoties leuis aura tumultis illis assibilat, toties rapti vento hostiles cineres, totis campis Victores POTOCIOS insonant; quoties vdo rore, arida ossa Æther infundit, Casus Dacicos flebilis Vnda plorare, Ausus verò POTOCIANOS delineare videtur. Ita hodieque vel de cadaueribus Viua Vobis Inclyti POTOCII crescit Fama; & quæ cæsis hostibus factorum, Vobis factorū ac Victoriarum monumenta sunt. Iniurius hic meritò in POTOCIANAM videri possem gloriā, si bellicosissimi IOANNIS Nomē festinatò præteruolās, quò eandem bellicæ Domus gloriam prouexerit, segni silentio suppresserem. Hactenus campestris & dici voluimus, & habiti sumus Poloni. IOANNES POTOCIVS etiam maria tentari benè Sarmatis, Lechicisque campos meliùs Ponto inferri posse, quàm olim Xerxes terris pontum infuderit, pulchrè docuit; dum solius gloriæ captus stipendio, auidissimus hic Famæ Institor, maria intrauit, & ad Naupactum cum immani Turcarum exercitu nauali prælio conflixit. Constare tunc potuit mundo fluitantia toto pelago POTOCIANA Arma intuenti, quam fortunata sit Crucis Carina, iam diu Noeticæ ratis umbris præsignata, quæ non Cæsarem aut Cæsaris fortunam, sed POTOCIVM eiusque famam, inter geminos Maris & Martis tutò veheret fluctus. Sed flectamus aliò vela, & lambendo rursus littora, erecta in hostilibus campis POTOCIANÆ Virtutis trophæa, debito impleamus plausu. Primum ante POTOCIAM CRUCEM gemere tremereque cerno, magnum illum Aquilonis Draconem Moschum, qui rabidâ in perniciem Nostram actus orexi, sinuosis toties Sarmatiam ambiuit spiris, sed casso tentamine; Rigido enim huic aurei nostri velleris Obseruatori, fatales semper à POTOCIA CRUCE venēre Argonautæ: peruiigiles licet sagacis fallaciæ tendat oculos, & in millena calidissimus serpens se torqueat volumina, POTOCIA CRUX Letheus illi Lituus est, qui vigilias æquè ac versutias æterno nouit mergere sopore. Agnouit in eadem Cruce innutrita periurijs bellua vindicem clauam, hæc

enim vti Primipila Fidei, laſam fidem per ſuos POTOCIOS, meri-
tò ſædiſfragi Sanguinis toties placauit libamine Igneas aliquando Im-
perante Iuliano CRVCES, tota Solyma coruſcantes, & iſſis hoſtium
ſuorum veſtibus ſuperſperſas accepimus; ineſt & ſuus POTOCIANÆ
CRVCI ignis, qui ſicut tenacibus ſæderum, ſerenum ac lucem, ita per-
fidæ Moſchouiæ fatum & ſepulchralem facem præfert: ac ne efferæ
huic Hydræ noua capita, in noua ſuccreſcant periuria, ferro illam &
flammiſ domat. An non his flammiſ regnante SIGISMVND
III. corruiſt ille perfidiâ ſemper quæſitus, perfidiâ partuſ Smolenſci-
anæ Arciſ vertex, dum NICOLAVS POTOCKI, Equeſtriſ alæ
Præfectuſ, Virtute quam ætate maturior, immiſſo in cuniculoſ ſub
Vrbem actoſ ignili, parentalem Moſchouitiæ perfidiæ ſtruxit ro-
gum; & nouuſ Scæuola traiectâ licet non tamen errante manu, inter
alatoſ igne ſuo globos, hoſtem Patriæ confecit, Certè vt conſtaret
CRVCEM fidei totiuſ baſim, pænaſ à Moſcho, turpiſ à fide publicâ
transfugij exigere, non ad aliaſ, quam POTOCIANÆ CRVCIS arae, illæ
tum perfidiæ victimæ conciderunt: nam IACOBVſ POTOCKI,
Palatinuſ Braclauienſiſ, per ruentiſ Vrbis excidia ad gloriâ elucta-
tuſ, primuſ violatæ paciſ vindictam rebellibuſ muribuſ intulit, & tu-
mentem ſuiſ turribuſ ſuperbiam, in puluere ac ruinis calcant, Victri-
cem POTOCIAM CRVCEM pro mœnibuſ oſtentauit. Sed quorſum
antiquoſ cinereſ ſuſcito, & de Smolenſciana ſauilla illuſtrandæ PO-
TOCIORVM Familiæ ſcintillaſ eruo, cum adhuc præ oculiſ ni-
ſtentur flammæ, quaſ Illuſtriſſimuſ Pareniſ Tuuſ, ſuperbæ barba-
riæ, vt in ſuiſ detumeſceret rogiſ, excitauit. Non vocabo Ad calcu-
lum æquiſſimo caſtigatoſ igne hoſtium Vrbeſ ac munitioneſ, quæ
in ſuo tumultuſ cinere, ſero aſt opportuno perfidiâ coercent buſto;
non inſperſoſ totiſ regionibuſ igneſ, qui Tyrannuſ, quanta à Poro-
cia manu, maneat pyra, præuiſ hiſce ſcintillaſ admonerent; ad il-
lam toto orationiſ æſtu rapior victoriâ, quâ potiſſimæ Moſchoui-
tici Imperij vires, cum ferociſſimo Duce SZEREMETO, ad pedeeſ Illu-
ſtriſſimi Parentiſ Tui ſubmiſſæ, caſibuſ ſuiſ POTOCIANAM CRVCEM
adorarūt. Mirabili verò tum æterni NVMINIſ factuſ eſt conſilio,
vt vterque Ducuſ (Veſtri nimirum Inclyti Sponſi Parenteſ) in
ſocietateſ tanti coirent triumphuſ; Ita nimirum decebat, vt qui ad
augmentuſ communis gloriæ, Proſapiæ ſuaſ felici Sanguiniſ nexu
vincire debuerant, in hoſtili priuſ ſanguine communem gloriâ ſta-
bilirent; nec ſolū amoreſ ſecum ac Sponſaleſ myrtos, ſed Victoriaſ
etiâ ac triumphaleſ Lauroſ partirentur. Verū & illud in fatiſ fu-
iſſe credo, vt leuiſſimi hoſtiſ periuria non ſine SRZENIAVIſ ex-
piarentur

piarentur Vndis, & qui Vindicem læsæ fidei Styga non perhorresce-
rent, ab Ultore SRZENIAVA Cruentam perfidiæ lustrationem re-
ciperent: ita omnia moderante NVMLINE, vt impius hostis, hinc
POTOCIA CRVCB territus, inde LVBOMIRSCIANO FLYMINE interceptus,
Vadum exitus fugiendo non haberet. Nescio sicubi vel magis sociâ
Ducum æmulatione, vel maiori militum contentione debellatum sit,
tot enim illic volitantibus pilis, licet penè sulphureo superfusus nimbo
Polonus exercitus, non iam cum Leonide sub emissorum umbrâ te-
lorum, sed sub flammeâ nube pugnaret, nec miles tamen gradum,
nec Dux officium deseruit; Atque hac tantâ & Ducum animositate,
& cohortium alacritate effectum est, vt tametsi hostis copiarum nu-
mero, armorum genere, & ipso situ loci paludibus intercepti longè
antistaret, Nostri tamen Virtute & Causæ bonitate Superioribus,
non modò palmam, sed parmam etiam ac vniuersa arma porrigeret.
Profuit à benignissimis Victoribus vinci; qui sufficientem victoriæ
questum laudem rati, redactos ad extremas angustias, cum vel lentâ
morte extabescere, vel violentâ delere possent, seruare tamen incolum-
es gloriæ, quam cæsos immolare vindictæ maluerunt. Ite nunc
barbari, & vitalia POTOCLIS Arma signaue, ac salutes SRZE-
NIAVÆ inesse aquas, experimento docti promulgate; quando-
quidem supremo iam conflictantes agone, cum de salute Vestra, Vo-
bis ipsis iudiciis cōclamatum esset, Vtriusq; horum munere, Vitam
recepistis & Animam. Vt tamen post tot clades minimè adhuc ser-
uandi fæderis docilis hostis, nimis assuetam, aliquando saltem, exue-
ret perfidiam, Castris, Signis, Copijs, toti que apparatu bellico exuto,
æternum memoriale dederunt; quàm non hostem cedere, sed hosti
cedere soleant Arma, quæ contra aperta pactorum sumuntur. Par-
tum sicut Causa inuoluerat, ita ruina imminebat rebellibus Cosaco-
rum turmis, quæ integram Moschi secutæ fortunam, eâ in sanguine
fluitante, Vltimum operiebantur naufragium; Verùm his dextero-
re fato & CRVX POTOCIA salutarem tabulam, & LVBOMIRSCIANVS
SRZENIAVA enatandi copiam fecit. Quam benè ab vtroque la-
tere incolumitati Vestræ prospexistis perduelles, qui & LVBOMIRSCIA-
NA potentiâ territi, contra illud Flumen niti desistis, & Mortis rei, Vitæ
signum in POTOCIANIS Armis effulgens, de supplice genu venerati
estis; Cæterum sicut parcere subiectis ita debellare superbos, ac per
Casus submittere CRVX POTOCIA nouit; idque satis iam turbæ illi
vsu cognitum, quoties enim seu genio loci contumax, seu affluentia
sua sensu luxurians, in rebellionem degenerauit, nunquam certius,
quam Virtute POTOCIA, vel sub iugum missa, vel ad agreste iugum

retracta est. Diutiùs Naleuaikum timuisset Polonia, nisi cantatissimus ille IOANNES POTOCKI eius excidia illatis propere signis maturasset. Paulukum & cæteram audacium colluuiem tot iam successibus ferocientem, ac proxima quæque contagione correpturam, quis, nisi Illustrissimus PARENS Tuus, felici Armorum obiectu compescuit? dum ternis exercitibus ad Niedźwiedźiełōzy, Borouiciam, & Starzec deletis, Contumaces aduersus dominantes perdomuit, & quò planiùs subiectionem combiberent, Chirographa mancipatus in eorum iugulis incidit. Nunc quoque cum nouissima erupisset flamma, licet interdum sceleri velificaretur fortuna, fatale tamen sibi POTOCIORVM Nomen, fex illa semper exhorruit; cum quibus tametsi aliquando dextro marte, semper tamen sinistro omine depugnauit; Emptam enim ad modicum mercede perfidiæ Victoriam, breui POTOCIA Virtus excussit, & in fatum eorundem egit. Ac tandem Legionibus Polonicis faustissimum Illustrissimi PARENTIS Tui regimen subeuntibus, tota illa turba POTOCIANÆ fortitudini aut pertinax iugulum, aut Victas manus dedit. Ferunt è sagittis Hercules, tota olim Græci exercitus ad Troiam fata, totum decennalis belli pendisse exitum, nec enim priùs nutans inter partes fortuna Achiuas acies respexit, quam felices sagittæ baiulo Philoctete castris illatæ, felicitatem his, Illo exitium attulerunt: Impleuit recenter veteris fabulæ fidem CRVX POTOCIA, Diuinioris illa Hercules telum est, quod cum nouus Philoctetes Illustrissimus PARENS Tuus Polonis infert Castris, en tandem illa rebellis Troia, suo itidem nixa Decennio, ad Armorum POTOCIANORVM fulgorem, vel ruinis elisa, vel sponte decrescens concidit; Et POTOCIANÆ gloriæ partim cruore, partim prece supplici litauit. Ingens hic mihi patet campus, quo POTOCIANA relegens vestigia, plenos circumducere possem stupores, sed quia inter postrema illi Decora numerant, agrestes cateruas ab arinis ad aratra transtulisse, grandiore Circo Victricia eorum inferam signa; & nouis Alexandris Reges quæram antagonistas. Procurrit ante oculos ferarum Rex Leo, & natiua sterilis glebæ suæ fame, & speciosæ prædæ spe ferox; qui cum in Gustavo Adolpho tota Prussia erraret, Terroribus Sarmatiam, Spolijs Sueciam impleret, nisi POTOCIANÆ CRVCIS abastus venabulo, cladem quam inferre auebat, in suorum ceruicibus retulisset: summà enim Illustrissimi PARENTIS Tui Virtute, Vicarias tum absentis KONIECPOLSCII Ducis curas, in exercitu Polono sustentante, cum ubique vires Sueticæ attritæ ruerent, POTOCLVSq; Omni prælio Victor immineret, Spe ac milite accisus hostis, vt Velamen aliquod honestæ fugæ haberet, campo quo consilere retro-

agen-

agentibus POTOIIS nequiuuit, cedere se pactis interuenientibus iactauit. Placuit tamen iterum fortunam experiri, & rediuiuas in Carolo Gustapho iubas, verum mutatâ iam pelle attollere; cum enim Sarmatis semper aduersus ferocia nitentibus, Leonina pellis non procederet, ex Lyfandri mente vulpinâ vtendum fuit; vt liberius sub ignoti tegminis obtentu, assuetus rapto genius grassaretur. Quæruntur igitur honesti firmandæ in Lechiâ potentia prætextus; speciosis Protectionis titulis, hostilitas velatur; & vis in nostra viscera contorta pro nobis stare fingitur; atque hæc omnia tam comptis affectibus, tantâ in Polonos pronitate, etiam Sacramenti Religione vallatâ aguntur, vt ignara doli Gens calidissimo Sinoni innocenter Credula, vltro fatalem Equum intra sua Pergama receperit. Non latuit tamen simulatio Illustrissimum PARENTEM Tuum, primus hic Laomedô contra grauidum tot armatis munus, bellatricem hastam strinxit; & reuocatis legionibus, quarum simplicitati ars Suetica turpi fascino illuserat, fictam Protectionem veris cladibus rependit. Circumscriberet hic etiam Hercules gloriam suam, ac positis iterum in Littore Balthici Maris columnis, NON PLUS ULTRA suum triumphali personaret in otio; sed POTOCIANÆ virtuti, Gentilitiâ CRVCE, Gloriam suam toti Orbi commensuranti, eadem victoriarum, quæ mundi meta est. Transferte ad Orientem visus, illic quoque POTOCIANI Nominis Orientem Solem adorari cernetis: splendeat licet toto Ortu Othomanica Luna, per minorum deliquia siderum, lucem suam intendere solita, CRUX tamen POTOCIA splendoribus illius fatalis Ecliptica est: nunquam enim cum hac absque insigni congressa est deliquio. Carminibus sisti, cælouæ deici Lunam, aut in tristem migrare pallorem, ferax figmentorum credidit Antiquitas; sed non adeo rudis, ac detrimentis obuia est Othomanica Phœbe, vt feralibus verbis aut herbis cedat: aliud illi Martiale carmen terrori est, quod cum toties ad suæ CRVCIS numeros POTOCI præcinunt, multum Turcicæ Lunæ detraxerunt fulgoris. Lugubrem hunc Cantum Illustrissimus PARENS Tuus Tumido illi Orfus est Abassio, cum Duci KONIECPOLSCIO iunctus, nonaginta millibus succinctum barbarum, & nostris castris incumbentem, sic ad numeros saltare docuit, vt numerum Cader superaret: præcinere enim iussâ conuiuiali symphoniâ, quæ mollium Sybaritarum fatis præluderet, talem ad illam festiui modulaminis cantilenam cœgit Turcas ducere choream, quali ad tumulum numeroso tripudio subsilirent. Nimis prolixus essem si totas Othomanidum clades vel vno Illustrissimo PARENTE Tuo Duce, datas, ad calculum reuocarem. Desinat verbosa eloquentia in percen-

D

sendis

sendis Skinderbassæ copijs hære, quas ille nouo sed glorioso lustro, per data neci capita, ense censuit: desinat stylus & calamus fugaces Turcarum Emissarios Scythas persequi, quos is idem velociore quâ vis pennâ affecutus impetu, felici Victoris gladij stylo confecit; & ad Budam cum Zolkiewio, ad Barium cum Koniecpolscio penè inter necioni dedit. ad Patriam tandem tanto Orbis circuitu fessus redeat sermo, cui etiam soli POTOCIANA militat fortitudo; & hic tota conquiescat Oratio, ubi vel ipsa Regum Maiestas securam libat quietem. Profectò singularis POTOCIANÆ Domus hæc gloria esse videtur, quam aliquando Sarmatis omnibus communem, fecerat CASSIMIRI gloriatio, quod Regum ceruices illorum sinibus tutissime incumbant, ac in fidelissimis pectoribus placidissimo somno respuerent. Hoc nostra vidit atas: tunc enim cum distractis à SIGISMUNDO III. animis partium studia in diuersa raperentur, secura Maiestas POTOCIANÆ CRVCI incubuit; & tota POTOCIORVM DOMVS, ne quâ parte Regale culmē dehisceret, opportuno armorum sustentaculo prouidit. Vidisses illic ANDREAM POTOCKI ad Guzow inter hostiles illatum Phalariges, vix inuento per vulnera ad suos receptu, Regali purpuræ pulcherrimo sanguinis additameto litantem. Vidisses NICOLAVM POTOCKI Reginalem Maiestatem, & vnâ Regni Sedem Cracouiam, ex publico fidei commissò Gentiliæ CRVCIS vmbrâ tegentem. Vidisses Illustrissimum PARENTEM Tuum pulchro cognati Sanguinis cinctum agmine, Regale latus, ne quâ Fata viam inuenirent, ambientem. Adeò CRVX, quam Coronis suis in Regalis tutelam inseruere Capitis, in Domo vel maxime POTOCIA Regibus Tutelaris est. Equis iam miretur Alexandris nostris Ephestiones hos in delicijs esse? quos integer periculis ac interritus animus, Regum Amoribus dedicauit? Equis stupeat Regalem Aquilam præclara honorum missilia POTOCIANÆ CRVCIS inspergere, cuius salutaris umbra Diadema suum texit? Xerxem olim illum prodigiosis ausibus an cladibus nobiliorem Regem accepimus, ad ornandam Platanum totius exercitus studia contulisse; ac monilibus, Tabellis, Votiuisque cinctam Cymmelijs, Æternum nescio gratitudinisne obcaptatam vmbram, an insanæ ostentatiouis Monumentum posuisse: quantò iustius POTOCIANA CRVX Regum abundat fauoribus, quorum integritati Hospitalem toties vmbram præbuit. Meritò circa illam Ducales Mitræ, Senatoriæ Curules, Imperatoriæ Clauæ, Regali fulgent appensæ dexterâ, quam inuiolata Fides Æternum Polonis Regibus Sacrâ esse voluit. Tantò Regum ipsorum adcomptam paratu POTOCIAM CRVCEM, nefas puto abique munere prætergre-

tergredi; Votium igitur appendo Carmen, & cui Sarmatica Aquila in ornamentum totas Regales pennas, ego leuem dico calamum.

QUò Concitatas Terribilis Rotas
Urges Erynnis? Sanguinis ebrios
Truci flagello agens iugales,
In Lechicos furiosa campos.
Informe circum, tabifici ruit
Agmen Doloris, seque patentibus
Infundit aruis; hinc Egestas
Exiguus male tecta pannis;
Illinc adeo lurida corpore
Fames, & vadas dilacerans genas
Luctus, luesque, & ferali
Dira venit Libitina passu.
pro quanta Lechis imminet Urbibus
phalanx malorum! quam rabidos minax
Distingit Ungues? Ut cruentâ
Dilaniet populos rapinâ.
Sed ô Perenni siccine Vulneri
Semper patebit Lechia? sic fibris
Vix dum renatis, ordietur
Vultureos saturare rictus,
Interminate prometheo Comes
Adiuncta pœnæ? sistite lugubres
Planctus poloni; nec feralis
Sarmatico natet ore luctus.
CRUX bellicosus POTOCLÆ Domus
Quæ fulget Armis, quadrifido sinu,
Dies beatos, & cupitâ
Sæclâ fluit pretiosa pace.
Spectatis? an me ludit amabilis
Imago signi? de Cruce fertiles
Laurosque, pacataque baccas
Cerno oleæ, per aprica tendi
Latè reductæ brachia Lechiæ;
Et asperatas tristitiâ genas,
Undante perfundi sereno,
Atque hilari renidere cultu.

Stupet recusus attonita artibus,
 Tepere sparsas per populos faces
 Enyo; nec squalente vultu
 Ire dies, nec auara circum
 Frendere totis arma Trionibus :
 Atque ipsa sese lentior, anxias
 Castigat iras; colla præter
 Iam placidi fluitant colubri;
 Et qui calenti ludere sanguine
 Suèrant iugales, immemores trutis
 Tabi, fatigant nunc amœna
 Innocuos super aruâ dentes.
 Quâcunque fausto voluitur essedo,
 POTOCLIANI Gloria nominis,
 Ignaua meroris caterua,
 Ante sacrum trepidante gressu
 Iubar vacillat : nocte satas retro
 Orci sorores, exigit aspero
 Timor flagello, dequæ toto
 Præcipitat mala cuncta regno.
 Campi feroci quos Sætica ungula
 Moschusq; nuper impulerat pede,
 Metu solati, restitutam
 POTOCLIS referant salutem:
 Et siue fessum pastor agit pecus,
 Seu feriatos vomere suscitât
 Arator Agros; Vindicem omnes
 POTOCLIVM resonant per agros
 Risère colles, & iuga pendulis
 Hirsuta ramis, vertice cernuo-
 - Assensère : cum VIVAT supina
 POTOCHVS treptère valles.
 Respondit Echo VIVAT, & assõnus
 Applausit Æther, VIVAT in omnibus
 Campisq; Sylvisq; ac per imas
 POTOCLIVS fremuit novales.

Hæc-

Haecenus Felicitatis Nostræ Vestigia secundo visu relegimus,
 dum conflictanti tot periculis Patriæ, in fortunato POTOCIANÆ
 CRVCIS Septangulo, salutarem Criticum monstrauius: promouet
 in vltius Spes Nostras propitius æther, ac æstuantis desiderijs
 animos, Felicibus LVBOMIRSCIANI SRZENIAVÆ Vndis irrorat. Mo-
 rari aliquod Vota Nostra Fatum, aut multus in rebus humanis ca-
 sus poterat, ac eam, quam sibi Augur Amor in POTOCIANIS desi-
 gnauit Insignibus prosperitatem, lento alicubi distinere hospitio;
 en iam fundente Cælo pronissimum ad Nos labitur FLVMEN, quod
 nauigaturam in illâ Salutari CRVCIS tabulâ Felicitatem, defluo im-
 portans alueo, Lechicis sistat exponatue littoribus. Implete vtras-
 que tanti Amnis ripas, merito plausu Sarmatæ; totis circum Cam-
 pis, festiua insonent celestium; Optatissimus POTOCIANÆ CRVCIS
 & LVBOMIRSCIANI FLVMINIS nexus, non fictos vobis, ac truci immer-
 sos Draconi ex Epidauro Æsculapios, non vana Matris Deorum si-
 gna, sed cupitam vehit Salutem; quam castior hodie Sulpitia, non
 maritali Cingulo, sed pronubo trahit annulo. Fluitantem in sui
 Nili fertilitate Ægyptum, adeo profunda olim cæli merferat obli-
 uio, vt vnius fiducia fluminis, nemo aratorum cælum respicere cu-
 rauerit; quasi idem ille Nilus, & campis fecunditatem, & Colonis
 obliuiosam propinaret Lethen: Nos qui ad ripam Fortunati SRZE-
 NIAVÆ excubantes, exigua capiendæ Felicitati tendimus retia, ita
 placidissimis eius detinemur Vndis, vt ex ipso defluentis tractu, æthe-
 reos ortus, qui tam beneuolum arenti Patriæ fundunt Flumen agno-
 scamus. Occuluit aliquorum amnium natales, prouida natura, ne
 leuissima hominum superstitione, quæ minores etiam consecrauerat
 riuos, turpiori religione ingentibus fluuijs illuderet: Nobis Feli-
 cissimi SRZENIAVÆ Origo in propatulo est, quam non occul-
 tæ venarum scatebræ, non furtiuus accessibus crescentes sub terrâ ri-
 ui, aut regurgitans per montium abdita Scaturigo, sed patentissi-
 mus Cælorum, bono publico, fundit Sinus. In illis amici ætheris
 vlnis nata, in illis meliori rore concreuit tam nobilis Vnda, quæ
 merito Eridanos aut Nilos per sola mendacia polis insertos, malè
 occupatis exigat Sedibus. Et verò probat Superæ Originis emi-
 nentiam Fluuius hic, ipsâ bonorum copiâ; primordiaque sua non
 temere à cælis peti, tantâ quantâ vniuersæ Sarmatiæ regnum allu-
 it, meritorum deducit eluuiæ. Natiuo enim actus Cælorum ritu,
 quemadmodum illi ad mundi inferioris tutamen semper attenti,
 ac pænè tot oculis quot astris vigilantes, aptandis terrarum com-
 modis, opportunos quotidie ordinant influxus: ita limpidissimus

hic Amnis, prouidis Sarmatiam percurrent flexibus, continuos ei
Virtutis & Opis LVBOMIRSCIANÆ voluit defluxus. Efferant alia-
rum natalitia domorum, coturnatis relationibus doctorum calami,
Famæque illis Opulentiam grandis loquentium dos pariat, vt per
adiutricem facundiam excreſcat, rerum ſæpè egena laudatio; For-
tunatus SRZENIAVÆ Ortus, ipſo ſe beneficiorum tractu explicat; &
phalerati ſermonis recuſat pigmenta, cui inexhausto fluens tramite
Virtus, aſſidua meritorum præſtat augmenta. Exeſte Oratorijs
fucatæ auxesibus panegyres; Amnis hic, pluribus quàm Peluſia-
cus Nilus Patriam inundans oſtijs, non rhethoricâ hyperbole, ſed
Virtute Famam exaggerat; nec à blandiente calamo, paucas atratæ
ſepiæ depoſcit guttas, cui totos illimi incorruptoque tractu Virtus,
Fortuna, Honor, pleniffimè fundunt latices. Faſtuosa, nimiumq;
ſibi indulgens quarundam Gentium iactantia, vt comptiorem abū-
dantiæ ſuæ ederet ſcenam, perſonatos etiam ſub ficto auro Fluuios
Orbis induxit conſpectibus; ita Ganges & Pactolus, ita Tagus & Her-
mus, neſcio fabulis an aureis Sabulis clariores, creditâ theſaurorum
nouitate, diu Orbis admirationem poſſederunt. Sed faceſſant iam
innatantes mendacijs diuitiæ, erutumque non tam de fluuiio, quam
de arrogantî cerebro aurum: LVBOMIRSCIANVS SRZENIAVA, veris
aurearum Virtutum tumens auctibus, aurea non ſolùm dona, ve-
rum ſæcula pleno Sarmatis importat vortice: mirandoque illi In-
dorum fonti concolor, Ferrum ſimul & Aurum, hoc ornandæ illud
tutandæ Patriæ, pulchro deſert profluuiio. Verum hic repente
ſtitit in ipſo littore, LVBOMIRSCIANÆ Gloriæ intercepta voraginibus
Oratio; vetat progredi illam, licet primis vixdum SRZENIAVÆ
tinctam elogijs, imperuia laudum amplitudo; Quæ etenim Elo-
quentiæ fluentia, adæquare ſperent tantum Flumen? ac eò aren-
tem vocalis Encomij deducere riuum, quo Gloria LVBOMIRSCIA-
NA plenis reſtagnat vorticibus? Eliquet totas Diua Themys inge-
nioſi calami Venas; Parnaffus fœcundiore Caſtalidum intumeſcat
fonte; Adhuc omnis hæc eruditorum torrentium copia, infra ple-
niſſimum SRZENIAVÆ dehifcet alueum, nec vlla doctæ pennæ elu-
uijs, vel prima Maximi Fluminis attinget capita: In Icarios (me
iudice) patet caſus, qui præſumptuosos emetiendo LVBOMIRSCI-
ANO Amni inferre parat calamos; Securos nimium Volatus, no-
xia excipient præcipitia; & audaciam retexere conantem altiſſi-
mos tanti Fluminis à primo ortu decurſus, ceræ pennæque remiges
deſtituent. Non committam ego ventofis hiſce auſibus leuem ca-
lamum, nec in Sacra LVBOMIRSCIANÆ Domus irrumpens adyta,
Inclytos

Inclytos Maiores temerario violabo eloquio, quos veneranda Vetus-
tas religioso sepsit silentio: Habeant debitam ex ipsâ taciturni-
tate reuerentiam; & in censu officiosæ mentis, tacitos numerent cul-
tus, qui extrâ omnes sermonis prouecti metas, florentissimæ elo-
quentiæ superant ornatus. Ægyptia quondam gratitudo, post-
quam pretiosam Apis Regis memoriam insigni dedicauit monu-
mento, excubantem pro vestibulo Mausolæi, Harpocratis apposuit
Statuam, appresso ori digito silentia edicentem; seu vetaret profa-
no sermone, regaliū taminari Maiestatem gestorum; seu nefas
crederet laudes illius sub imparibus hominum vacillare linguis,
quem collata Ægypto beneficia Dijs immortalibus miscuerunt.
Pares ex abdito intendi metus, suumque pro LVBOMIRSCIANÆ Fami-
liæ Propylæis stare sentio Harpocratem, qui disertam castigans
audaciam, adduci habenas imperet eloquentiæ, infra meritum lo-
quendorum hæsuræ; nimirum, Magnis Mentibus, minora quam
pro dignitatis exigentiâ laudum tentamina, Crimina sunt; & de-
tractum gloriosæ gestorum pompæ creditur, quidquid non adæquas
Gloriæ molem, properanter deponitur. Atque hinc est, quod Sa-
cro perculsus horrore, noluerim vocare ad calamum Illustrissimos
LVBOMIRSCIANÆ Domus Maiores; & suâ Virtute in perennem
sæculorum transcriptos capacitatem, ad exiguas obstrepentis char-
tæ detrudere angustias: Videri enim posset, coacta in ordinem
tantorum Heroum emerita grauitas, si per singula censa capita, le-
uissimum balbutientis Oratoris subiret lustrum. Satis profectò il-
lis accedit ad laudum cumulum, mensuram excessisse laudantium;
& sæculorum infixos memoriæ, amplitudine suâ omnem infantis
eloquentiæ transcendisse amplificationem. Vnum duntaxat illum
calente adhuc fauillâ, per ora hominum volitantem STAN-
SLAVM LVBOMIRSKI, Palatinum Cracouiensem, Tuum Illu-
strissima SPONSA AVVM, sine insigni piaculo prætergredi non
potui; Quem Amor Lechiæ, & terror Otthomanicæ potentiæ eò
prouexerunt, vt etiam Liuorem ipsum auditi Nominis reuerentia,
si non ad plausus, ad tristes certè deuocet singultus. Viuit hodie-
que Sepulchralem non sentiens iniuriam, tantus ille Bellator; & fa-
to suo maior, mirabundo Orbi stuporem, memori Barbariæ pauo-
rem, adhuc effulberat. Vritur hucusque ipsis eius Cineribus
Othomanicæ lunæ fastus, Cuius Virtute totum Osmani robur,
Orbis viribus subnixum, in Cinere & Fauillâ desedit. Hunc tan-
tum Heroem, à primis statim cunis Bellona suo pulueri addixit, &
Laconum ritu, ad aspera præliorum, militaribus Gentilitij Fluminis
duratum

duratum Vndis, per omnes illius sæculi circumduxit arenas; donec ad eos formaret ausus, qui in Maximo ad Chocimum Circo, sub totius Orbis spectaculo, Maximum totius Orbis Hostem conficerent. Vixdum prætextam egressus Sagum induerat, tanto Gloriæ æstu, tanto Victoriarum ferebatur cursu, omni periculo obuius, omni Martis choro præfultor; vt iam tum pateret, tenerum illum Herculem, in elidendis minorum anguium præludere ceruicibus, cuius manibus Summæ Hydræ exitus dedebatur. Nec errauere Hominum Vota; per militares enim plausus, & Hostiles fremitus exercita Virtus, ad illud demum fastigium emicuit, cui etiam tumidissima Luna attrita cornua submisit. Nouum vt scires habere te Saluatorem IOSEPHVM Patria, illum quoque Othomanica Luna non tamen somniantem, sed noctes diesque pro Communi salute Vigilem, adorauit. Pridem iam auara hæc Phæbe arcuatam tendit finem, vt Campestris accessione Sarmatiæ, facilius deinde Totum compleat Orbem; Sed enim non alit Somnolentos POLONIA Endymiones, qui Lunæ amoribus deseruient: In Triuijs Hecate, ista, Triformis utique mundi Domina colatur licet; Equitibus Polonis, vti olim Romanæ Nobilitati, Luna ad pedes hæret. Hæsit spectante Sole, superba hæc Turcarum Cynthia ad pedes STANISLAI LVBOMIRSKI fatalis belli aduoluta casibus, cum ad Chocimum raptis inconsultè ferociens armis, vltra sexaginta millia armatorum LVBOMIRSCIANÆ Gloriæ immolauit: tum demum Taurica hæc Dea, pridem aduenarum Sanguinem sitiens, suorum sanguine Paci Polonæ litauit. Libet hîc longioris moræ carpere solatia, & Chocimenses illos Campos, cladibus Turcicis, ac LVBOMIRSCIANIS laudibus insignes, lentiore oberrando visu, Nostri quondam Periculi, Auxilijque imagines, Terroris & Opis vestigia plenius vsurpare. Post cælum in Cecorâ Poloni exercitus Ducem, palantes legiones, sparsum toto Regno per immissos Scytharum manipulos terrorem, opportuni Othomanicæ ambitioni visi sumus, in quos maiore incurrens impetu, insatiabilem orexim distringeret, & liberos domesticique tantum patientes Vomere Polonorum campos, ad Seruilia iuga vocaret. Coguntur toti potentia Turcicæ nerui, conflantur exercitus, armatur Orbis, & tantis agminibus succincta barbarâ cupiditas, nobilem prædam Spe ac Voto partitur. Tot periculis oberrantibus, vnus tùm omnium voto signabatur æui sui Achilles STANISLAVS LVBOMIRSKI, in quem ardui belli moles inclinaret; Vnus consonâ populorum voce poscebatur Victoriosus SRZENIAVA, qui totas mundi vires trahen-

trahentem Osmanum, procul à nocendi metu, ad vltimas Sarmatiæ ripas moraretur. Procurrit nouus Leonides LVBOMIRSCIVS ad nouas Chocimi Thermopylas, vt immensas Thracij Xerxis Copias, paruo distinendo milite, tumentem numero barbarum, per clades doceret, apud Sarmatas, non computari Viros sed æstimari; nec molem cuiusquam Exercitus formidini esse, sed Virtutem. Accessit & illud ad LVBOMIRSCIANÆ Gloriæ coronidem, quod Serenissimus VLADISLAVS Princeps, additus difficilis belli Comes, Virtutis eius auxit pondus; Quantum enim Fortitudini STANISLAI fideret Patria, satis carissimo illo pignore monstratum voluit, cum totam pubescentis Maiestatis fortunam, inter tantos armorum fluctus, Vni SRZENIAVÆ commisit; Optimè cautum Regali æstimans deposito, quod LVBOMIRSCIANO Flumine, sub Virtute remige veheretur. Ac primis quidem tremendi belli tentaminibus, partitas cum CHOTKIEVICIO Lituanicarum agminum Duce Curas, Heros LVBOMIRSCIVS sustinuit; sed illo humanis exempto, tota belli fax ad SRZENIAVIAS Aquas hæsit; ebriusque ille fortunâ suâ Osmanus, qui Xerxeos fermè exercitus trahens, Maria compedibus frenare, Montes in planum deducere, Fluvios desiccare poterat, Vnius huius obiectu Fluminis, in rapidissimo Votorum cursu, à Campestribus Sarmatiæ retractus est. O quantos ille mouit aulus, firmauit conatus, immisit exercitus! Vt æmulo Cyri tentamine, quemadmodum ille Gnidem, sic Barbarus SRZENIAVAM distrahere, & vadum traijciendis in viscera Regni Copijs facere posset; Sed totâ vi in irritum recidente, cum non iam è Iugalibus vnum vt Gnides, sed totas Equitum sorberet cateruas Victoriosus hic Amnis, & nocturnâ insuper eluie Thracijs castris inundaret, perosus fatale bellum hostis tanto redemptum sanguine, cedere potius quam reliquo exercitu excidere maluit. Si non omnia nouitatis studium fabulis miscuit, & aliquam inuenit fidem mirandus ille lacus qui vnum vix adæquans Scutum, Stagyrita teste, ad motum ingressi, omnia laxat latera, capacioreque semper quò altius progredieris latitudine hiat; Crediderim in LVBOMIRSCIANVM Amnem vim suam transfudisse: nam & hunc, cum exiguis castrorum circumscriberetur limitibus, semper tamen barbari, quò maiori petièrè nisu, eò longiora tranandi restare spatia, refugumque littus, & Campos Polonos procul subduci senserunt. Eat nunc Othomanica Luna, & vel Poëtis indicibus, toto se proluat Oceano, ac omnibus (vt potè miniltra humoris) innatet fontibus; SRZENIAVIVS Amnis barbaræ Phæbes ignorat consortia; & si quando hoc Fluuiò tingi appetijt, in Sanguinei nim-

nei nimbi prænuntium pallorem commigrauit. Non solâ dehinc terrarum umbrâ Lunam infici, nec ab illo duntaxat interiecti globi obice vim eius per deliquia collabi, periti Astrorum vulgatè Censores; etiam sub Vndarum laborare aspergine, defectisque viribus concidere Othomanicam Lunam vidimus; cum vires ac Splendorem illius, qui à vitreæ latius radiare suevit repercussu lymphæ, consumi ad LVBOMIRSCIANVM Amnem sensimus. Toties barbara hæc Phœbe & furore suo, & adscito Sulphurei Martis candens igne, in castra Polona tantis detonuit fulminibus, vt ardentes Cyclopum caminos, totumque adeò cum suâ Æthna Vulcanum, rapi ad incendia nostra crederes; & tamen tanto quasitus apparatu terror, omnesque illi morienti Patriæ destinati rogi, Vnius LVBOMIRSCIANI Fluminis vorticibus, non restincti modo, sed hausti absorptique sunt. Conclamatum de vitâ saluteque tuâ (si mens non læua fuisset) iam tum conijcere poteras Osmane, cum LVBOMIRSCIANO Flumine tardante, Flammiuomâ Gradiui arte non procedente, per Virtutem STANISLAI Aquâ & igni senseras tibi interdictum. Vix credidit attonitus nostro suoque periculo Orbis, fieri potuisse, quod postea factum publico excepit tripudio; Osmanum nimirum illum toto Orbe coactos, totique etiam vincendo Orbi pares circumagentem exercitus, à parua Lechiadum manu, non submotum modo, sed turpibus accisum cladibus, laceras vires Thraciæ suæ intulisse: Verum effecit dexteritas, Ingenisque LVBOMIRSCI Ducis Animus, vt paucitatem nostrorum Virtus pensaret; cum singulos è Suis voce manuque animando, ne singuli viderentur, in Centimanos Gyges ac Briareos pulchra fortitudinis arte, transformaret. Quis verò iam edisserat, quantis post retusum confusumque Othomanum Triumphalis hic Amnis, per Gentes & Populos ist laudibus! Quâ-
tis vtrâque eius ripa ad gratantes aras, colluxit ignibus? cum nō modo publica Regni studia ad texendas Victori SRZENIAVÆ conspirant Coronas, verum ipse Regalis luncus seruati memor pignoris, è Coronato vimine nobilissimam fert Ciuicam. Concurrit vndique suspensa omnium Statuum hilaritas, videre se ambi-
gens quæ videbat; & in felici prouoluta littore, hinc plenis Victoriosum Amnem delibat gaudijs, illinc fluitantes per altum, Otho-
manici naufragij reliquias, nantes in gurgite vasto Thracum Ma-
ximos, spectans, securis sua quondam tericulamenta incessit diris. Ita pleno Gloriæ, Honorum, Opimæque Prædæ illatus Alueo LVBOMIRSCIANVS Amnis, gratissimo Patriæ influxit gremio; Sarmaticamque deinde integritatem, quam in suo STANISLAO tantâ Vir-
tute pe-

tute pepererat, in eodem iam tum Purpuratorum Principe, ad extremum vitæ labilis decursum sustentauit. Tota abhinc publicæ salutis moles, Vnius illius humeris incubuit; Idemque Flumen quod periculossissimi belli faces restrinxit, pacis negotia ambitu suo complexum est. dedignante Patriâ pacatas suas Oleas, alijs ali Vndis, quam quæ Victoriarum fertiles, difficillimas etiam nutrent lauros. Saturum demum Vitæ & Gloriæ STANISLAVM perenniori Vitæ Gloriæque Virtus intulit, & niueum illum Ætate, ac illibato Candore Animum, in niueas & Heroibus pridem destinatas Lactentis Circuli Sedes, transuexit: Satis Orbi ad plausum, Ecclesiæ ad ornamentum, Sibi ad meritum, non tamen Patriæ, & Bonis Omnibus satis ad Votum Viuentem. Cuius properis perculsa Fatis Sarmatia, longioribus indulgeret gemitibus; nisi resplendens in Filiorum flore, Tanti Patris Virtus, Ternis illis doloris fomentis, dolorem leniret. Demulcet iam serenâ lætitiâ, tumentes nuper luctu oculos; cum auocatis à tumulo ad Filios oculis, Rediuiuum in Prole Parentem, & superstitem in tantis Ingenijs, Magnum illum STANISLAI Genium admiratur. Sanè Vnus ille quondam durante Vita Lechicæ Prudentiæ Trismegistus, post fata hodie Tergeminum agit Gerionem; cum terno Natorum Patriæ dato pignore, Omnes felicissimo nexu, ac vno veluti spiritu, ad salutem eiusdem animat. Pulcherri-
mè hic è totius Regni Voto & gustu Virtus innocuas Medæ partes sustinuit; cum grauem illum annis & actis Æsonem, in Filiorum iuuentute refinxit, & non herbis sed gestis, in ternâ Prole, Viuum viuentemque fecit. Mutatum non ablatum Patrem credimus, quoties tanta Pignora, plenosque Patre Spiritus, gratulabundi cernimus. Verum dabitis credo veniam Magna Magnorum ALEXANDRI CONSTANTINIq; Nomina, si laudes Vestras illibato prætergressa pede, illuc quò totus Nuptialis Pompæ, & communis lætitiæ rapit impetus, festinet Oratio; ac in auspiciatissimâ Illustrissimi GEOR-
GII Supremi Regni MARSCHALCI & Exercituum CAMPIDVCIS Domo hospitam figens Stationem, liberius & ipsa sub tantæ apparatu Hilaritatis Genio suo indulgeat. Ad magnos illa quidem ausus accingitur, dum festiuis interueniens Hymæneis, rudem suadam in Augusta Tanti Herois Tecta inferre molitur; Sed quoniam Muta gaudia Simulacrum habent mæroris, maluit à lætâ loquacitate, præsumptionis notam, quam ab inurbano silentio, tristitiæ effigiem mutuari. Venient aliorum eruditi calami, & ingentes Illustrissimi MARSCHALCI laudes grandiore ingressi coturno, de rapidissimo SRZENIAVÆ Torrente hausta Eloquia, plenior per Gentes & Ætates fundent Elo-

quentiâ : Verum & Nostra tenuis canna LVBOMIRSCIANÆ adstre-
pens Gloriæ, Aristarchi supercilia non metuit, quam suis adcrescen-
tem ripis Vberimus SRZENIAVA, fœcundo Munificentiaë tractu alit
& alluit. ALEXANDRO olim in Libethris immolante Cupressinum
Orphei simulacrum, subitò erumpentibus guttis immauit, & vnus
Regis repentinus aspectus, muto illi signo, nescio lacrymasnè an su-
dorem expressit; Attonitis prodigio cunctis, euentum Aristander
ad Gloriam Magni traxit, tantis inualiturum prænuntians Gestis,
quanta vel disertissimis Orpheis sudorem prolicerent, & per omnes
deinde Ætates, Doctorum pennas in sui præconium eliquarent. Fa-
tiscant (vt libet) sub Macedonicæ laudis pondere lassatæ, inanimæ Sta-
tuæ; sub Illustrissimi MARSCHALCI Encomijs, & olim sudabunt, & nūc
Viuacia Vatum sudant Ingenia, æstuant pennæ, laborat facundia;
& tamen facultatem superat laudum, Copia laudandorum; pluraque
semper restant, quò plura hauriuntur ex vberissimo SRZENIAVA Glo-
riæ volumina. Et profectò quis Herois huius facta verbis æquet?
aut illorum amplitudinem Meritorum vocalis facundiaë numeris
illiget, quæ modum numerumque vincunt? Eminuit ingentibus
populorum studijs Illustrissimus STANISLAUS LVBOMIRSKI,
sed Felicitas eius aucta in Filio, dum præteruecta est; gaudet PHILIP-
PVS ille Maiore ALEXANDRO, suamque numerat Gloriam, quæ in
tanto Nato refulget. Nolo in omnia Illustrissimi Gesta, leui inuo-
lare calamo, aut toto latissimi huius Fluminis vagari æquore: li-
ceat saltem Aquilonarem legere Oram, & illas delibare gratulante
pennâ guttas, quas male fœderatorum effusus tinxit cruor. Capi-
tales iam olim, cum Aquilâ Sarmaticâ intercesserant Leoni Suetico
iræ, quas tamen illa felicibus librata Alis, eousque despexit, donec
accisæ domesticâ rebellis Russiæ auulsione pennæ, proniorem iniu-
riæ redderent, & Leoninos vngues ad opportunam prædam exci-
tarent. Irrumpit ille Maioribus quàm putabatur Campis, priusque
illatis quam denuntiatis Armis, Terrore, Rapinâ, Dolo, implet ac
miscet omnia. Non tamen concolor Aquilæ suæ Polonorum Can-
dor, vinci aliter nisi ministrâ fraude, potuit; Cui semper vel maxi-
mè Niuea animorum simplicitas patet: proinde vt in suum Colo-
rem Chamæleon ille omnia traheret, Nostrum etiam induit, sati-
andaque cædibus & spolijs Sarmatarum Arma, Sarmatis militare si-
mulauit. Accedimus Creduli, nescio quem fascinum Borealem
passi, Hostiumque Nostrorum numerum augemus, Dum Nostra
Nos tueri putamus: & vix anteaëtis sæculis audito errore, Nostra
vltro promouentes Fata, Patriam ignari prostituimus, quam malè
falla-

fallacibus armis protegendam committimus. Facile tunc fuit confusis simulatione rebus, Piscari in illo turbido; & Arcibus, Prouincijs, Urbibus, vltro in sua vincula ruentibus, Transmarina implere retia. Parabatur & regno vltima tendicula, sed post illud fatale Reipub: Turbidum, ad limpidissimum SRZENIAVAM^c Suetica Sagena hæsit; & Quantus sub illo personato habitu lateret Hostis, ad prouidentissimas LVBOMIRSEIANI Fluminis Aquas transparuit. Adhuc tamen mala sua agnoscentibus, Error quidem & Hostis in odio, sed Libertas tantum in Voto: Fortalitij enim omnibus, Armis, Bellicoque apparatu exutæ nobilitati, solus supererat amissæ Libertatis Amor, maiorum patientiâ, & turpissimæ illusionis conscientia magis ardescens: ad quam ocyus Equestri Ordini recuperandam, Vnus tum Ordinis huius designabatur Antesignanus Illustrissimus MARSCHALCVS; nec vlla certior sarcindæ iacturæ spes apparuit, quam si felicissimus LV. BOMIRSEIANVS Amnis, intercluso aditu, redituque, Spes, Vota, conatus Hostiles frustraretur. Quam verè Diuinabas Carole Gustaphe, Omnia iam patentis Sarmatiæ, ausibus tuis fore peruia, si prono hoc Amne ferrereris? Sed enim Asbamæam SRZENIAVA voluit Aquâ, quæ vti fidem seruantibus dulcis & placida, ita eandem nausentibus, aut callidâ pactorum interpretatione eludentibus, Ferox & infesta, vindicibus immemores Fæderum assultat, arroditque vorticibus. Alterius Fortunæ vehendæ Fluuius iste parabatur, & Lechicus Achelous meliorem spectabat Thesea, quem hospitalibus Vndis, totoque officiosæ Fidei acciperet gremio: Reduci enim ad Regna sua Serenissimo IOANNI CASIMIRO, quem tanti belli turbo extra abstulerat, LVBOMIRSEIANVS primùm occurrit Fluuius; ac in suam recepto LVBLOVIAM, eam demùm Consiliorum, Armorumque fudit copiam, quâ aspirantibus Superis, ad optatum Regni portum feliciter SERENISSIMVS enauigauit. Tyberium refert Tranquillus, imperij adhuc ambiguum, speciosoque tum Legationis titulo Rhodis exulantem, vt Animum metu ac cupidine discerptum, Ominibus deliniret, adiisse Geryonis oraculum, ac sorte tractâ, talos aureos in Aponi fontem iecisse; Optimo sanè euentu: nam iacta alea summum numerum proferens, ad summum illi Romæ, Orbisque Imperium prolusit. Parem (securiore tamen ritu) diuinandi rationem inijt, magnis tunc conflictans discriminibus, Serenissimus IOANNES CASIMIRVS, Sortes suas non superstizioso Aponi fonti, sed fortunatissimo commisit SRZENIAVÆ; Et verò optimo Omine, vltimum enim quò Gloria & Maiestas Regalis prouehi possent, tandem iecit, absoluitque numerum.

Illustrissimus MARSCHALCVS, dum quò certius tali ac fortes caderent, Armata fatali huic ludo manum applicuit; & illum tantæ Fortu-
næ Collusorem Carolum, decoctis omnibus Copijs, Famâ, Spolijs, propudiosè campo cedere coegit. Felix tamen prodigus ille Alea-
tor, vel eo nomine censerì potest, quod amissis Omnibus quæ raptò coegerat, integram tamen Vitam & Salutem Tabulâ extulit; quâ ne demùm excideret, male parto Regno excedere maluit. Et sanè adeò in arctum deuenerat, Virtute & Fortunâ LVBOMIRSCIANAM manum, iactumue sequentibus; vt intra geminum Amnem, Vistulam & Sanum, tertio Felicissimo SRZENIAVA vtrumque interfecante conclusus, Vltimum nouus Ecclesiæ Pharaon operiretur naufragium: Verum Amne illo semper Potentiæ Sueticæ formidando, aliorum impetu vincendi distracto, facile tum vadum, maiori reseruandus cladi reperit, cui VNUS SRZENIAVA imperuius semper fuit. Ne tamen insoluto exitus sui nauilo, eluisse fatalem Fluuium putaretur, Salutem suam, cæde suorum mercatus, lectissimas quatuor millium Legiones ad Warkam LVBOMIRSCIANO gladio annumerauit; nescio miserandus magis an culpandus, quod tanto militum, præcipuæque nobilitatis amisso flore, ignobili famæ superesse, & superbum caput, totis militarium caputum myriadibus, redimere sustinuerit. Nulla dehinc ruentis in præceps Sueci Visa clades, ad quam LVBOMIRSCIANA Virtus, Comes immò prædux non accesserit; Ruere solutis repagulis cerneret placidissimum alias Flumen, ac totis Lechia infusum Campis, Omni Hostem regno exigere: acsi in factis esset, vt nec ad Charontis cymbam cæsi, nec ad Natium Mare viui Sueci, sine LVBOMIRSCIANI SRZENIAVÆ accessione peruenirent. Verum Summa Illustrissimi MARSCHALCI Virtus, ad obstinatissimum Hostem emicuit, cum Caput & Regni & belli Cracouiam, obsidione circumdans, etiam Muros à LVBOMIRSCIANO Amne sub-
rui ostendit. Tanta licet fuerit Valentissimi Hostis pertinacia, vt omni exactus campo, interclusa erumpendi potestate, adempto com-
meatu, consumptâ annonâ, solâ Spe ac furijs suis pasceretur, iam tamen victas fortitudine LVBOMIRSCIA tendebat, & dedisset manus, nisi insperatò superueniens Transsylvanus, properantem ad LVBOMIRSCIANA tempora triumphalem laurum, (potiore mox pensaturus Lauro) in ipso cursu inhibuisset. Tum demum Victoria, propioris spe Victoriæ, non tam amissa quam omissa, LVBOMIRSCIANO Fluuio locum dedit, vt Pannonijs quoque superfusus montibus, nouum Transsylvaniæ cataclysmum induceret; & perfidæ gentis scelus, immissis domans flammis, meritam Aquâ & Igni Transsylvaniæ Lu-

niæ Lustrationem perficeret. Neque hîc rapidissimus LVBOMIRSCIANÆ Virtutis stetit Torrens; attritum licet montuosi itineris difficultate militem, in Sarmaticum deducens planum, toto panè regno Transsylvanum, nunc præuius, nunc subsequens, eousque circumduxit, donec hisce viarum inæandris (planè flexuosum suum æmulatus SRZENIAVAM) ad illum propelleret Labyrinthum, ex quo nisi noua Ariadne, eiusdem Illustrissimi MARSCHALCI benignitas filum exitus præbuisset, rupto vitali stamine excedendum foret. Hæret hucusque suspensus tantæ nouitate Victoriæ Mundus, & conflatas è totâ Transsylvania, Dacia, Moldauia, ac rebellium Cosacorum turmis Rakocij Copias, in suis requirens bustis miratur, eatenus duntaxat Sarmatiam irrupisse, vt turpius vincerentur; & clade suâ, Magnum LVBOMIRSCIANORVM Trophæorum fierent additamentum, hoc solo gloriæ, quod in parte Gloriæ LVBOMIRSCIANÆ numerentur. Emittit liberè, nouo vincendi genere Victum, & suis castris Vincum carceratumque Hostem Illustrissimus MARSCHALCVS; amissæque iam redditum vitæ, maiori insuper donat munere, cum ei sobriam mentem reddit; Fastu enim suo magis quam natiuo Baccho ebrium Pannonem, digestâ ad Salubres SRZENIAVÆ Aquas quâ tumuerat Superbiæ crapulâ, setò sapere docuit; vt sciret quam cito ruant Arma mole suâ, quæ perfidia impellit. Ingemuit ad funestum Socialis belli exitum Suecus, & sonitu cadentis perculsus Rakocij, iterumque totâ Prussiâ Vndantem cernens LVBOMIRSCIANVM Amnem, præoccupare fatorû incerta, ac suo tutius Mari, quam tanto Amne claudi prælegit: quid enim supremum cruentæ fortunæ operiretur naufragium? cum nouo Proclo Illustrissimo MARSCHALCO, Græcos iterum ignes proferente, Aquas igni inardescere, & de SRZENIAVIANO Flumine, flammeas nubes superbiæ Thorunio superferri; Refractariæ verò GRAVDENTI etiam debacchari, extremamque cladem impluere cerneret? Ita demum urgente pacem, & Armis ad Marieburgum, & Consilijs ad Gedanum Illustrissimo MARSCHALCO, æternum inter affinia regna Fædus coaluit: quod tamen vt certiùs esset, ille, qui bellum ceperat, Carolus, vitâ terminauit. Quis verò hic edisserat, quanto plaudentium sono æther? quantis pro Salute LVBOMIRSCIA Votis, Aræ laborauerint? dum eodem SRZENIAVIO Flumine Administro, profuga Pax reueheretur, quo formidolosissimum bellum, in Exilium actum est: Omnium lætitiæ Illustrissimus MARSCHACVS intererat, Omnium vocibus inerrabat; & Fugatus Hostis, vindicata Libertas, Pax restituta, in donis LVBOMIRSCIANIS numerabantur; fatente Sarmatiâ, absque felicissimo

mo SRZENIAVÆ traiectu, nullum adhuc nobis pacis commercium, cum Oceano futurum fuisse. Hæsurum hîc in Mari, veluti communi Fluminum metâ, ac Maritimo Hoste, autumare quispiam poterat LVBOMIRSCIANVM Amnem; verùm ille flexuosum suapte naturâ nactus alueum, Omni infundi Campo, Omni Hostili ripæ affilire auet. Procurrit statim à deuectis Sueticæ Pacis donis, nullâ ipse lentescens pace, ad extremos Moschorum Fines; & barbaris inundans Campis, tantas illas Szeremethi Copias, irâ, cupiditate, congenitâque ferociâ ardescences ita restrinxit, vt non modò Martius, sed vitalis etiam natiui caloris feruor, fatali in eis gelu riguerit. Quantis tum Patria concussa terroribus? cum procurrens ad intima Regni, Lublinum, Varsauiamque Hostis, ferro & flammâ metum intenderet? & cunctis ad nictantes illos, per Poloniam ignes, magis metu ac torpore frigescentibus, fuga, Gemitus, funera Patriam implerent simul ac exhaurirent? Ruissentque in peius omnia; nisi Domitrix illa, flammarum ac ferri, LVBOMIRSCIANI Fluminis, Vis, tempestiuo procursu, Moschum Patriâ exactum, Vitâ etiam exegisset. lætet suas fastu innutrita Antiquitas Victorias, & semper maiora veris venditare solita, Orbem Nostrum Veterum attonet seriè Triumphorum: Censeat modio Annibal cæsum ad Cannas & Thrasymenum Romanæ Nobilitatis militiæque Florem; Cæsar Triumphali superbiâ vidisse se Parthos ac vicisse gloriatur; Scipio interceptum Castris suis Syphacem, ac eâdem sepultos fossâ quâ bellauerant, Numidas ostendet: Omnium horum tumentem iactantiam diminuit, aspersa tantis Victorijs labes; & Annibalem locus ac ille iniquus Romanis lacus, Scipionem nox furtiux Victoriæ lenocinans, Cæsarem hostis (vel ipsius confessione) marcidus ac imbellis coercet, splendoremque trophæis demit. Ast LVBOMIRSCIANVS triumphus, de ingenti Szeremethi partus exercitu, nihil à loco aut consciâ nocte, hostiliuè socordiâ, totum à virtute & constantiâ mutuatur: Palam & Cælo Teste, in tam aduersâ Nobis locorum vligine, cum ignito hoste pugnatum est; nec dolus & tenebræ, aut tectus clandestinâ nocte Mauors, in societatem tantæ venêre Victoriæ. Mirabili tum pugnx genere debellatum est, cùm Polo nus Miles stipendiorum inopiâ moratus Victoriâ, vt cunctantia tela acrius in hostium iugulum contorqueret, non modò ferro sed auro etiam SRZENIAVIO duraretur: Sparsis enim in Sarmaticas pariter Scythicasque legiones, è proprio thesauro missilibus Illustrissimus MARSCHALCVS, sic optimo commento Fortitudinem Liberalitate obarmavit, vt dum opportuna cunctanti Militi auget munera, densa in-

simul

simul hostis Funera adaugeret. Ita tum geminam raro euentu adeptus Victoriā Illustrissimus, cum suos dono, Hostes damno subigit, Vnicā eāque pulcherrimā largitione, & Militem animauit, & Moschum exanimem, per exhausta cadaueribus castra reddidit. Insonuit lætis Carminibus Patria, & LVBOMIRSCIANO Flumini, non modo Contraneus Amnes, in natiuis ripis, verum etiam Sacer Tyberis, Triumphales prætulit faces: quin & Terna illa Austriadum Flumina, Trino Regnorum tractu fluentia, illud ad pleniorē Supremæ Fortunæ decursum spectare crediderunt, si Victoriosi Amnis commercio Maiestatem suam incingerent, & in sortem Romani translatum Imperij Principe Alueo suis terris infunderent. Quid vltimos Europæ memorem Gades? ubi Hercules Noster Illustrissimus MARSCHALCVS, ad illas veteris Alcydæ Columnas, vocalissimā famā increbuit, & Aureum Hispaniæ Tagum ditiorē Nominis sui Gloriā captiuauit: Testatum id fecit Potentissimus Hispaniarum Monarcha PHILIPPVS; quī sicut præsentem Patris virtutem, annulo olim subarrhauit, ita absens inuictam Fortitudinem inuicti Adamantis monili, in Hospite Filio consignauit. Habes quo Gentium non modo oculos, sed Amores etiam prouoces Sarmatia, quæ triumphalem hunc Amnem, plenis ab vtrāque Ripā Lauris incrementem, Orbi ostentas. Non sic certè fabulosa illa Stygis Aqua, sollicitæ Thetyos ope adhibita, bellicosum Achillem, atque Felicissimus SRZENIAVA Regnum, cladi exitioque imperuium facit; Quācūque sui parte Patria LVBOMIRSCIANS Aquis tingitur, dum consilijs sustentatur, melius quā ille tandem à Paride sublatu Achilles, contra Fata munitur, nullique ferro aut dolo domabilis existit. Ringantur licet Æmulatio ac Liur, indiuisi Magnarum Mentium Circumpedes, Salutareque has Aquas obliquo dedignati oculo, mortiferā petant tæbe; LVBOMIRSCIANS Amnis, omnes inuidiæ præteruectus metas, Herculeo ritu, cui quondam vel ipsa odio suo velificata est Iuno

Superat & crescit malis. Irāq; cuncta fruitur in laudes suas.

Nullus Maleuolorum obex intercipiet Fortunati huius Fluminis Cursum; qui totus in salutem Patriæ effusus eousque destinato virtutis voluetur tramite, donec perenni sæculorum illatus Memoriam, Æterno se totum Bonorum Omnium infundat fonti. Verum iam tandem in beatā huius Fluminis ripā, cernua respiret Oratio, & ad confitas circum Lauros, Votiuum appendat Carmen.

Q Vi modò latis Lechicos pererrat
Flexibus campos, LV BOMIRSCIANUS
Amnis, illimes trahit è superno
Æthere Lymphas.

Nectar æternis Sociale mensis,
Diluit tanti latices Fluenci,
Inferens fausta pretiosorem
Ambrosiam Undæ.

Hinc per Apricos ubicunq; campos,
Ludit obliquis sinuosa ripis;
A superfufo melior virefcit
Flumine Campus.

Ridet elatis adoperta tellus
Floribus, pando resupina collo
Lilia, & totum referens feraci
Syrmate Pastum:

Ac ubi tristi iuga pressa Marte,
Horridis nuper riguere telis,
Roscido sparsas, Bona Pax SRZENIAVÂ
Plantat Olinas.

Non Draconino sata dente Proles,
Fluctuat densis per agros sarissis;
Non sub armatis titubant gravata
Calcibus Arua.

Sed Ceris fulvis redimita culmis,
Turgidas plenâ segetes quiete
Explicat Campo; fluidisq; pacem
Enarrat aristis.

Quisquis Hostiles meditatus ausus,
Stridulas fumante faces Gradiuo
Spargere in Lechos parat, in SRZENIAVIS
Mergitur Vndis:

Fluctuans vastas procul inter Undas
Visitur Moschus; trepidum ac paudentem
Occupat fluctus, fuga nulla tanto
Eripit Amini.

Non inaccesi meritum cœnentur
Pannonem Montes: super innat altis
Carpathi saxis, & auara inundat
Sanguine Regna.

Ille per

Ille per totum volitare pontum
Impiger, multo madidas cruore
Vix iubar effert Leo, quas paternâ

Siccet in umbrâ

O Triumphali decorate Lymphâ
Qui vehis prono Lecha Fata tergo,
Amnis! Hostilis Tibi nescit ulla

- Innare cârina

Ambias longo patriam meatu
Latus & Felix; Superisque serus
Fontibus, multa celebrata Fama

Adde fluentia.

Quâ per arentes Lechia nouales,
Fertiles laudum sinuabis Undas;
Spontè submittent Tibi cuncta gratam.

Flumina Therym.

Textaq; annoso Tibi ferta musco
Cernua adspargent; Veniet reclinis
Vandalus, lambens Tua blandiente

Gramina fluctu.

Ast Mare & Thracijs violentus Undis
Attremet Pontus; Tanais SRZENIAVâ
Territus Famâ, gemet inquieti

Murmure venti.

Cernis ut paller refluxo vacillans
Vortice? & lento tremulus meatu
Errat, ac mestum caput in supinis

Oculis herbis.

Audijs TYBRIS Tanaim superbum,
Æmulâ Romæ riguisse Lymphâ,
Atq; septeno veneratur alnum

Colle SRZENIAVAM

ALBIS applaudit, Socioq; letus
Murmurat RHENO; LVBOMIRSCIANVM
Flumen, in totis pelagi, Amniumq;

Perfonat Undis.

Ad Vos denique anhela Populorum respiciunt Vota, ô Felices
æterni Amoris compediti, qui Publico Bono, dum victas Amori da-
tis, Patriæ insimul Opitulatrices obligatis manus. Attollit illa fessum
malis

malis caput, & nuptiali immista pompæ, nobilis hæc Conuiuia, plenius hodie sua haurit solatia; nec præsentis duntaxat vsu, sed futuræ etiam Spe lætitiæ capta, Felicitatis è tanto Coniugio prouenturæ absorbetur imagine. Idem Annuli qui Corda Vestra, Communia etiam totius Sarmatiæ subarrhant Vota; Eadem dextræ, quæ Coniugalem ad Aras paciscuntur fidem, pro Salute Vniuersi Regni, pulchrâ fideiussione stipulantur: Hinc erecta ad sonum lætissimi hymænei Patria, liberius iam suis indulget Votis, & per futuri ludens Simulachra emolumenti, non dubias Fortunæ suæ Spes, in longiores iacit exporrigitque annos. Errant illi præ oculis amæno spectaculo Inclyti Bellatores, Victoriosi Duces, Proujdi Senatores, quos dum è tanto Ducalis Senatorijque Sanguinis nexu sibi designat, in Festiuos plausus, in effusam rapitur Hilaritatem. Habet enim uero amplissimum hilaritatis campum, in quo laxatis fiduciæ, lætitiæque decurrat habenis; Quid enim in Vobis non omnigeno excipiendum plausu? & ad Cæterarum Gentium inuidiam ostentandum? Ætas primò pubescens Vere, in yberrimum nox meritorum destitura Autumnum; Fortuna Summis in Regno par, Summis extra Regnum, libertatis rudibus ac inexpertis suspiranda; Genus ipsâ Virtute obstetricante editum; & quæ diuisa beatos efficiunt, Vos soli collecta tenetis. Circumfert audidissimos per omnia Vestra Decora oculos serenata iam Patria; & præcedentium seriem in Spem vocans futurorum, Inclytos Maiores dum recolit, suis mersa votis, secuturæ posteritatis Virtutem, Spe ac conceptâ specie præcepit. Spectat hodie tot illos & Tantos Familiarum Vestrarum Proceres, velut è suis excitos tumultis, & ad lætissima Solennia congreges, Pronubas Vobis non tam Faces præferre quàm Virtutes; & à Tantis quæ Vos primo initiandos Amori, circumfundunt Splendoribus ac Flammis, nouam & ipsa in sese deriuandam præstolatur lucem. Apollonium Thyanæum accepimus insigne ab Hiarcha Indo, Brachmanum Principe accepisse donum, Septenos nimirum annulos, coactis in se cæli viribus nobiles, & tractam à Septeno Planetarum Orbe Virtutem, in proxima quæque transferentes; Huic muneri Magus ille seu Philosophus Fortunam suam, mirosque effectus retulit, ac in illis superstitiosis annulis, captiuam quadantenus Superioris naturæ vim detineri, & tota vitæ suæ Fata, annulari reuolutione circumagi, vanè credidit. Implent (meliori tamen Omine) Nobis gemini Vestri Coniugales Annuli, Septem Indicorum vicem & fidem, quos cum hodie non iam fictâ cælorum sed verâ Maiorum Vestrorum Virtute fœcundos aspicimus, certiore designa-

designatione, fortunæ communis Solatia, ex aureorum horum, quam Thyanæus ex Cælicorum Orbium concursu combinamus: Quidquid enim per Politicorum Orbium Polos, vel in annoso Saturno Prudentiæ, vel in Arbitrio Deorum loue æquitatis, Marte Fortitudinis, Mercurio Facundiæ, Venere Gratiarum, Sole ac Luna Splendorum, coruscat ac effulгурat, totum id in Maioribus Vestris repertum, ad Coniugales Vestros defluxit Annulos, eosdemq; integrā tantarum Virtutum transfusione ditauit. Iuuat aliquantum hære, & Pronubos hos Annulos lentiore visu percurrere, in quibus certiore artificio Virtus, Maiorum Vestrorum, quam olim in mendaci Æneæ Clypeo, Vulcanus totam generis eius inclusit seriem. Refulgent in Tuo Illustrissime SPONSE Annulo præter Paterni Sanguinis splendorem, tracta ex Illustrissima Genitrice KALINOVIORVM Decora, multis maximarum Familiarum admistis fulgoribus coruscantia: Sagitta illa KALINOVIA geminis Stellis, ast multiplicibus insignis Trophæis, dum Tuas ambit manus, ita te bino illo fidere illustrat, vt simul sub felici Sagittario natum, ad summi honoris metam dirigat. Domesticum sed fortunatum natus es Illustrissime Virtutis ac Fortitudinis Athæneum, in quo hinc POTOCLIORVM inde KALINOVIORVM Genijs, velut Indigetibus Diuis animantibus, Generosos & Spiritus combibisti & ausus; meliusque ad Maiorum Tuorum gesta, quam Themistocles ad Milciadis Trophæa ardescens, illos bellatricis adolescentiæ concepisti igniculos, qui deinde Martiæ illati palestræ, Patriæ lucem, Hostibus fatalem fauillam pepererunt. Sensit id nuper malo suo Traßyluania, cum Illustrissimi MARSCHALCI, fortunam secutus, illius Gloriæ per Hostilium Urbium incendia aduceres; & dextram æternum LVBOMIRSCIANÆ DOMVI consecrandam, sub LVBOMIRSCIANIS oculis, in hostili sanguine abundè intingeres. Sensere rebelles Cosacorum Turmæ, cum (præter frequentissimas Propitio semper Marte velitationes) ad Medirecium, viginti millibus cæsis aut fugatis, æternum Nomen in refractarijs perduellium Ceruicibus exarares. Quantus ille Tuus fuit tunc ausus! Quam inuicta animi Fortitudo! Cum vix duobus militum succinctus millibus, agmina illa mole, numero, impetu ruentia feliciter perrumperes, & instrato cadaueribus campo, palam faceres; etiam paruam manum satis ad victoriam esse, si magnā animetur mente; nec numerum in bellis sed fortem humerum Lauros aucupari. Triarios omnes illos Victoriæ Tuæ Commilitones nuncuparem, nisi virtus in maiorem eos prouehens titulum, dum

DE SIGE . . . I . . . bis mil-

bis milleni, viginti millia sternunt, omnes fecisset Decumanos. Tantæ Gloriæ plenus, Tantis & Maiorum Tuorum, & Victoriosi Martis conspicuus fulgoribus, dum hodie ad Amoris venis Aras Illustrissime, ab his, qui te ambiunt splendoribus, certiùs quam à lambente Tullium Seruiliùm flammâ, ingens sibi Patria emolumentum, Tibi verò ornamentum appromittit. Adstat Illustrissima SPONSA, & (ne quid ad Votorum summam desit) hæc quoque noua Lauinia tam suis quam Gentilijs ignibus circumfunditur: Ille faustissimus Annulus (quo velut aureo compede æternum vincit Amorem) non iam imbelli Musarum choro mixtum Apollinem, sed fortissimis tot Maiorum Heroibus Socium Martem pulchro Patriæ pandit spectaculo. Cernis hic paruo compendio, quos longo sæcula digessere ordine Duces, Duces in Ostrog & Iaroslav. Comites in Tarnow, BRANICIOS, LIGESIOS, Dij boni quanta Nomina, non modo Sarmatico sed Vniuerso Orbi Gestis & Famâ nota! Quorum Gloriam si per singula vellem Capita retexere, quid aliud quam Iliadem iterum, nucis putamini, Operosâ audaciâ includere tentarem? Vna Materna Illustrissimæ SPONSÆ LIGESIORVM DOMVS, tantis in Patriam meritis, tantis abundat splendoribus, quantorum Encomijs ille duntaxat suffecerit, qui non solum laudandorum Copiam, sed laudum quoque Facundiam à LIGEZIUS desumpserit, Excitandus hic de tumulto foret ille Aurei Oris & Calami STANISLAVS LIGZA, qui Tullianum æquè natiuo quam peregrino cultu assequutus dicendi florem, suauissimâ suadâ, domesticos exterosque populos detinuit. Suspirat hucusque iucundo LIGEZIANÆ memoriæ capta sensu Sarmatia, dum in exactas ætates visum proferens, Inclyta illa Pacis ac Belli Lumina grato percurrit intuitu: Adhuc suo admordet desiderio Patriæ pectus, Fortissimus ille LESCVS BOBRIEVS ad Varnam Exercitus Poloni Dux, qui dum VLADISLAI sequitur fasces, fati eiusdem inuolutus succubuit, & Fidei Virtutiq; LIGEZIÆ immoriens, cadenti Maiestati, sanguine suo parentauit; Adhuc omnium prouocant Amores, illa Tiaræ Decora, IOANNES Plocensi, Felix Leopoliensi Mitris insignes, Ecclesiæ quondam pariter ac Patriæ Hostibus, sollicitâ vigilantiam metuendi. Næuè antiqua, (tametsi nullâ obliuione antiquanda) promam, plenis hodieque populorum fertur fauoribus HERMOLAVS Regni Thesaurarius, rarissimo euentu, & ærarium publicum intactis redditibus, & Familiam solâ Gloriæ accessione locopletans; Plenis Illustrissimæ SPONSÆ AVVS NICOLAVS ROGATIANVS Castel: Sendom: ob eximia in

mia in Patriam merita, Becensi, Ropciensi, Zyduciensi, Præfe-
 cturâ honoratus. Atque horum omnium Decora & Virtutes, do-
 talitio sibi consignatas lute, ad Tuas hodie Illustrissime SPONSE
 transfert manus Illustrissima CHRISTINA, Comitissa in Wisnicz
 & Iaroslaw, LVBOMIRSKA; Dum inter tot Pronubas faces
 non ex apum, sed ex Insignium Profapiarum Ceris laboratas, ad
 POTOCIANOS transit Lares; Splendida Maioribus, splendidior
 moribus, qui illam pulchro incinctam Virtutum Satellitio, Tuo
 Amori, Orbis Lechici addixere stupori. Illud innoci Oris ebur;
 Illa Virginei pudoris purpura; Ille modesti visus, velut sub nube
 radians fulgor, totaque ad numeros Virtutis efficta, Corporis ac
 mentis habitudo, quidni Te Illustrissime SPONSE in perennem
 dilectionem, Orbem raperent in admirationem? Abscedant mē-
 dacis Pandoræ commenta, & illa toto Deorum conatu adcompta
 Pulchritudo; Illustrissima SPONSA simulatos Pandoræ fastus,
 veris actibus euincit, dum pulcherrimos virtutum radios, non ab
 inanibus Deorum figmentis, sed ab Insignibus Maiorum sumit
 exemplis. Tibi verò hic Illustrissima DUCISSA in Nieswiesz &
 Otyka RADIVILIA, maxima tanti fulgoris Gratiâ, maxima de-
 betur tantæ virtutis Portio, quæ distractam præcoci Fatorum iniu-
 riâ, ab Amantissima Genitrice Illustrissimam SPONSAM, Maternâ
 complexa curâ, ad illud virtutis deduxisti fastigium, quod Illu-
 strissimæ LVBOMIRSCIORVM Domui in solatium, Orbi trahetur in
 exemplum. Immigrauit illa in Mores Virtutesque Tuas, & quæ
 se Filix loco habitam sensit, etiam morum felicissimâ successionem
 ex asse hæredem instituit. Satis latè fertur, per Omnes Sarmatici
 Orbis metas Illustrissimum NOMEN Tuum, in cuius ornamentis,
 Fortuna, Nobilitas Virtus, præcipuas consumpsere curas; Satis
 Pietas, quam Tu semper inter præcipua Decora numerasti; Ve-
 rum erit istud ingens Gloriæ Tuæ additamentum, quod cum &
 à LVBOMIRSCIANO Ortu Magnum Flumen, & à Ducali RADIVILI
 Coniugio AQUILA sis magnarum Alarum, Vtrumque hoc curâ &
 affectu in Charissimam Alumnam transtuleris; quam & Gentilitij
 Fluvij ritu, pleno Virtutum ferri alueo, & Aquilæ more, in con-
 nio oculo Heroicis pasci splendoribus docuisti. Promulgant
 promulgabuntque olim eximiam Pietatem Tuam ipsa Tempora,
 Aræ, Orphanotrophia, Aurumque Deo non pressa manu Sacrum;
 quodsi (vt Humanis sua instant fata.) casus aliquis vel Supre-
 ma necessitas hæc attriuerit; Habes non moriturum quod ipsa
 finxisti in Illustrissima SPONSA, ad perennem sæculorum iactan-

tiam Pietatis Virtutisque Tuæ Simulachrum. Procedit illa hodie Te, Virtutesque Tuas, Maiorum Decora & Spem Patriæ ferens, dumque ad aras dextram æterno Amori illigat, Patriæ Spem, Familiæ Expectationem, Populorum lætitiā, Posteritatis Gloriam, eādem coniugalis nexus catenā secum trahit. Perge iam Fortunatū Par, & generosos in longas ætates proferens passus, meritis ac virtutibus Annos extende; Expectat arrecta Ominibus suis Patria, ex tam pulchro Ducalium clauarum fœdere, Hostium stragem; Expectat ex hoc Heroici Sanguinis nexu reddendam sibi Heroum seriem. Restitues enimvero Illustrissime SPONSE Fauentibus Superis Felicitatem in Opere, quam præfers in Nomine; Restitues Illustrissima SPONSA Æuo Nostro antiqua illa Virtutum miracula, & quidquid AVGVSTVS in Liuia, TRAIANVS in Plotina, CARES in sua suspexere Arthemissia, iucundo compendio, Orbis in Te ipsā proferes conspectibus. Assurgent Vobis Nostræ, applaudent futuræ ætates; & Felix POTOCKI ac CHRISTINA, Comitissa in Wisnicz & Iarossaw, LVBOMIRSKA, certā ambitione vouentium in mensuram olim trahentur Votorum. Ad Vestrarum Virtutum normam exigent Actus suos posterī, ad Vestras pleno ore insuescent laudes, sicque & præsentis æui Gloria, & secuturi elati memoria, Orbem insignium Gestorum attonabitis miraculo, donec ad Supremam æternitatis delati metam, POTOCIAM CRVCEM

CRVCIS DOMINO, LVBOMIRSCIANVM AMNEM perenni Voluptatis Torrenti inferetis,
DIXI.



BIBLIOTHECA



CRACOVIAE,

In Officina Apud Hæredes STANISLAI LENCZEWSKI BERTVT:

Anno Domini, 1661.



